

四庫全書

經部

欽定四庫全書

經部

春秋胡傳附錄纂疏卷十六

詳校官監察御史_臣查普長

給事中_臣溫常綬覆勘

總校官進士_臣繆琪

校對官中書_臣李葵

謄錄監生_臣俞成鰲

欽定四庫全書

春秋胡傳附錄纂疏卷十六

元 汪克寬 撰

宣公

宣公五年晉靈公六年齊惠公元年衛成二十七年

宣公六年杞桓公二十年宋文三年春王正月公即位公羊傳繼弑君

不言即位此其言即位何其意也穀
傳繼故而言即位與聞乎故也

宣公為弑君者所立受之而不討賊是亦聞乎弑也

故如其意焉而書即位以著其自立之罪而不嫌於同辭美一也有小大則褒辭異惡一也有小大則貶

辭異一美一惡無嫌於同

公羊美惡不嫌同辭張氏曰宣公受弑賊之立而居

其位其臯同於桓公而十八年之間皆書王與桓公不同者法已舉於前矣天理不可以常亡王法不可以久廢故存王以舉大法亦所以正宣公之臯也高郵孫氏曰桓弑隱而立春秋月而不王以罪天王之不能誅之宣弑子赤而立春秋書月書王不罪天王之不討者非赦之也天王不王自平王而下桓公之時王道之不行未久有王者興則桓公在可誅之域不於在位當於其將終竟桓公之死王不能誅聖人不忍周道之衰而弑君者得志也十八年間書王者四終始反覆欲其見討而竟不能於是月而不王以

為法於萬世至於宣公則王道之不行百餘年矣亂賊接迹而起而王者未嘗誅之非天下無王何至是也宣弒子赤自立晏然無所忌憚春秋於即位之月書王以明王道之行不容一日息也惟其無王是以誅宣公之時王不足望故書王以討也

公子遂如齊

惠

逆女

魯秉周禮喪未暮年遣卿逆女

何氏曰識喪娶復書不親迎

何亟

乎太子赤齊出也仲遂殺子赤及其母弟而立宣公

懼於見討

高氏曰不待喪畢而遽如齊逆女者恐姻好久不通而齊人來討也

故結昏

於齊為自安計越典禮以逆之如此其亟而不顧者

必敬嬴仲遂請齊立接之始謀也

家氏曰宣公繼世之初斬焉在疚而

首遣大夫如齊逆女所遣見又同惡之大夫春秋書之所以著敬嬴襄仲弑君篡國之本謀亦以見齊元無道黨其臣而使之弑君也蓋請昏割地魯所以自結於齊者皆在遂與得臣如齊之時故即位未幾而襄仲遂有逆女之行無何又以割地而出春秋書即位書逆女書遂以夫人婦姜至自齊書齊人取濟西田著魯人結齊之援以弑其君著齊人輔魯之篡俾弑其君益明王法以治齊魯之罪二國皆有討也王氏曰赤齊之甥也憂齊之有所黨故欲急昏於齊也公穀謂譏喪娶不知喪娶之不足罪也可罪者喪娶之故

其後滕文公定為三年喪父兄百官皆不欲曰

吾宗國魯先君莫之行也

孟子朱子註謂魯不行三年之喪者乃其後世之失

非周公之喪紀浸廢夫豈一朝一夕之故自文宣莫

之行矣

據文公亦三年之內國昏

此所謂不待貶絕而罪惡見

現音

者也

杜氏曰不識喪娶者不待貶責而自明也薛氏曰公薨夫人出大夫逆女亂倫而娶齊人不創

夫人之出而違禮婚媾皆罪也臨川吳氏曰文公使公子遂納幣已非禮况宣公逆夫人而可遣僖祖之弟乎然負篡弑之罪而急於結齊昏以定其位者乃惡之大喪娶卿逆之非禮則其惡之小者爾愚按文公未終禫制而圖昏春秋深加貶黜不書逆者姓名不書如齊不稱夫人不稱氏以著其罪宣公未及期年而亟於喪娶春秋書使卿逆女書夫人至僅去夫人之氏此非特從同同之例蓋以宣公之惡有大於喪娶者故詳錄之以見其縱私欲而紊典禮實欲結大援而逭天討也石氏曰輦弑隱公遂殺子赤桓公

之立逆女使輦宣公之立逆女使遂斯二人者在國
以為賊而桓宣以為忠也故終桓宣之世輦遂皆稱

公子無
異辭

三月遂以夫人婦姜至自齊

公羊傳遂何以不稱公子一事而再見者卒名也夫

人何以不稱姜氏貶曷為貶譏喪娶也喪娶者公也則曷為貶夫人內無貶于公之道也夫人與公一體也其稱婦有姑之辭也穀梁傳其不言氏喪未畢故略之也其曰婦緣始言之之辭也程子傳脫氏字

有不待貶絕而罪惡見

音現下並同

者不貶絕以見惡

本公

羊夫人與

音預有罪焉則待貶而後見故不稱氏

何氏曰去

氏輕於去姜范氏曰夫人不能以禮自固故與有貶劉氏曰婦人不專行在家制於父母夫人有貶則父

母與有罪矣高氏曰古者一禮不備女不肯行故夫
詩曰雖速我訟亦不女從雖速我獄室家不足

人其如何知惡無禮如野有死麕音困詩小序野有死麕惡無禮也

能以禮自防如草蟲同上草蟲大夫妻能以禮自防也愆期有待如

歸妹之九四易象傳愆期之志有待而行也程子傳所以愆期者由已而不由彼女子居貴

高之地有賢明之資人情所願娶其過時未歸蓋自有待非不售也則可免矣凡稱婦

者其詞雖同立義則異逆婦姜於齊病文公也不稱女而

稱婦著文公之以婦姜至自齊責敬嬴也有姑則以亟於成昏也婦禮至無

姑則專以夫人禮至不稱姜氏而稱婦姜著敬嬴之欲速以姑自居也張氏曰公子遂宣公之為亂臣賊

子明矣不待貶絕也

敬嬴嬖妾私事襄仲以其子屬

章欲反

之殺世適

音嫡

兄弟出主君夫人援

如字

成風故事

即以子貴為國君母

公羊母以子貴

斬焉在衰

音崔

服之中

十昭

叔向云又見檀弓

請昏納婦而其罪隱而未見也故因夫人

至特稱婦姜以顯之此乃春秋推見至隱著妾母當

國用事為後世鑒者也槩指為有姑之詞而不察其

旨則精義隱矣

趙氏曰書以者不當以也高氏曰不直書夫人婦姜至自齊而稱遂以者

明公子遂不當以夫人歸也婚禮莫重於親迎豈容他人得以之歸哉遂蓋公族之尊者尤不可也家氏

曰夫人非大夫所得以也遂挾齊以弑其君娶齊女為寡君之婦魯之國家實制於遂書以者著其罪也公穀言婦有姑之辭婦姜之嫡姑則出姜也經於子卒之後書夫人姜氏歸於齊於宣公始立書遂以婦姜至自齊所以責齊受人之出母而與之婦所以責魯棄母於齊而娶齊女事悖妄以為姑也絕滅天理甚矣○劉氏曰左傳稱族尊君命含族尊夫人非也一事而再見卒名耳必若云然公子結遂及齊宋盟非受命亦稱族歸父豹意如其往也氏其至也不氏無有夫人居間也何以舍族耶

夏季孫行父如齊

惠左傳納賂以請會

經書行父如齊而不言其故謂納賂以請會者傳去

聲

下同也經有不待傳而著者比

毗至反

事以觀斯得矣下

書公會齊侯于平州則知此會行父請之也又書齊人取濟西田則知其請蓋以賂也雖微傳其事著矣

諸侯立卿為公室輔

二閱

猶屋之有楹也而謀國如此

亦不待貶絕而惡自見

音現者也

高氏曰春秋時國君不以其道立苟得一

預諸侯之會他國不得復討其罪所以季文子不憚自行者欲假大國之權以定宣公之位也宣公之位定則一時臣子黨亂誤不然以行父之勤勞恭儉相國之罪皆可以逃矣

去聲三君而無私積

子賜反襄五季文子卒無衣帛之妾無食粟之馬君子是以知季文

子之忠於公室也相三君而無私積

必能以其君顯名與晏嬰等矣

朱

曰季文子三思而後行可謂慮事詳審而宜無過舉矣而宣公篡立文子乃不能討反為之使齊而納賂焉豈非私意起而反惑與呂氏曰君母不正孽子篡立而國之大臣恃大國以免施施肆肆無所忌憚行父名大夫也而猶若是先王之澤泯矣張氏曰文公世子之死在官當誅者公子遂其首行父次之冢氏曰季友受托孤之寄酖叔牙戮慶父立僖公魯之宗社賴以再安行父其孫也乃為賊使齊而歸先君之母今又為之再使納賂諸會有忝厥祖多矣

晉 靈 放其大夫胥甲父于衛

成左傳晉人討不用命者放胥甲父于衛而立胥克

公羊傳放之者何猶曰無去是云爾古者大夫已去三年待放君放之非也大夫待放正也古者臣有大喪則君三年不叩其門已練可以弁冕服金革之事君使之非也臣行之禮也穀梁傳放猶屏也杜氏曰胥甲下軍

佐胥臣
之子

放猶羈置毋去其所

杜氏曰放者受罪黜免宥之以逮孫氏曰放逐也

比於

專殺者其罪薄乎云爾

李氏克俞曰稱國以放與稱國殺大夫同

或以為

近正

羊公

非矣大夫當官既不請於天子而自命以為

有罪又不告於司寇而擅刑猶不遠於正乎

蜀杜氏曰周衰

諸侯擅恣法度而有屏放其臣者春秋不得不譏之薛氏曰諸侯不專放大夫其書者僭天子之事也永

嘉呂氏曰書放大夫惡專放也稱國以放君與大夫咸與焉晉放胥甲是也稱人稱人以放國亂無政而

衆人擅放之蔡人放公孫獵是也

秦晉戰于河曲撓

女教反

史駢之謀

者趙穿也若討其不用命則當以穿為首止治軍門

之呼

去聲文十二晉人禦秦師于河曲史駢曰秦不能久請深壘固軍以待之士會謂秦伯曰史駢

必實為此謀將以老我師也趙有側室曰穿好勇而狂若使輕者肆焉其可秦軍掩晉上軍趙穿追之不及反怒曰襄糧坐甲固敵是求將獨出乃以其屬出宣子懼秦獲穿乃皆出戰秦師適夷駢曰薄諸河必敗之胥甲趙穿當軍門呼曰不偕貶可也而獨放胥待期而薄人於險無勇也乃止

甲父則以趙盾當國穿其族子而盾庇之也

蘇氏曰胥甲趙

穿其罪一也放胥甲而捨趙穿穿盾之族子也張氏曰穿以盾之側室而獨免刑之偏頗如此非所以治

有罪主諸侯也

桃園之罪

明年穿弒靈公于桃園

其志固形於此矣故

稱國以放見

音現

晉政之在私門而成上侵

也借

為後戒

也

臨川吳氏曰河曲之戰及今八年豈有不用命之罪八年而後討哉必胥甲以他事取惡於趙盾而

逐之也愚按放胥甲者弑夷皋之兆也殺胥童者弑州蒲之兆也高氏曰諸侯之大夫有罪當請于天子

或殺或放今晉專放其大夫可乎况舜討驩兜之罪而放之崇山者投之遠方也崇山猶在封疆之內非

蠻夷外國也晉人於衛同為列國而放其有罪之臣於衛是鄙衛也衛人受晉之逐臣而不辭豈亦迫於

大國之勢歟劉氏曰秦穆公悔不用百里奚之言以亡三帥自狀其過而作秦誓晉靈公耻不得志於秦

而追咎善謀放胥甲於衛人之度量相越豈不速哉使晉之君臣因胥甲之言推而廣之脩己而不責人

鄰國將來服奚患秦哉春秋書放胥甲以其無罪而譏晉之濫也○啖氏曰公羊云近正也此傳是三年

待放之義乃三諫不從以禮而去者今放名雖同而實殊傳不見事迹故云爾高郵孫氏曰穀梁云稱國以放放無罪也案稱人自為與其下為別也安得以稱國而見其無罪乎

公會齊

惠

侯于平州

杜氏曰平州齊地在泰山牟縣西張氏曰後漢志琅琊國陽都故地

有牟臺注平州在縣西今屬沂州沂水縣愚按沂州今屬益都路

按左氏曰會于平州以定公位魯宣篡立踰年舉國

臣子既從之矣若之何位猶未定而有待於平州之

會也春秋以來弑君篡國者已列於諸侯則不復

扶

反下致討

隱四杜氏曰諸篡立者諸侯既與之會則不復討

故曹人以此請

負芻于晉

成十三年曹宣公卒公子負芻殺太子自立十五年會戚晉執負芻歸京師十六年曹

人請曰若有罪則君列諸會矣

夫篡弑之罪毀滅天理無所容於天

地之間身無存沒時無古今其罪不得赦也以列於

會而不復討是率天下為亂賊等倫紀于弁髦此仲

尼所為

去聲

懼春秋所以作也然欲定其位者魯宣宜

稱及

我所欲曰及

齊而曰會者討賊之法也凡討亂臣賊

子必深絕其黨而後為惡者孤也

張氏曰凡亂臣賊子之所以不敢縱

其欲者以有霸主大國能討之也齊乃魯之鄰其力足以正魯而惠公不明於義利邪正之辨始許仲遂

以亂魯之適庶終會平州以定賊子之位則亂賊復何畏而不逞哉會者外為志魯宣欲求寵以定位而書齊惠之志以治黨惡之罪與桓公鄭莊垂之會一也晉為盟主諸侯所取正而齊宋弑君威弗能加魯亂不治見晉之無能為也愚按齊惠因歟職之逆得立乎其位故魯宣納賂求會驩然而從盖同惡相濟耳特齊之強大足以託魯故宣公君臣殫意以固結之也

公子遂如齊

惠左傳襄仲如齊拜成

宣公篡立之罪仲遂主謀為首惡初請于齊遂為上

客而並書介使

去聲

者罪叔孫得臣不能為有無亦從

之也

論語焉能為有焉能為無季子然問仲由冉大求然則從之者與子曰弑父與君亦不從也

夫有以死爭

去聲

者矣然削而不書者以叔仲惠伯死

非君命失其所也

愚按孔父仇牧荀息非以君命而死皆特書於策竊疑忠義之臣扞

君之難固不可待召命而後致死也杜氏謂史謂襄仲不敢書殺惠伯其理或然遂及行父則

一再見

音現下同

于經矣如齊拜成雖削之可也又再書

于策者於以著其始終成就弑立之謀

愚按遂得臣同如齊見公

子接而請立之逆謀之始也今既定宣公而拜成于齊逆謀之終也

以戒後世人臣或

內交宮禁以固其寵或外結藩鎮以為之援

去聲

至於

殺生廢置皆出其手而人主不悟者

唐武三思李輔國通韋后張后

而擅殺五王遷上皇於西內崔胤崔昭緯結王行瑜
李茂貞朱全忠而脅帝殺杜讓能王搏蘇檢貶陸扆
王其慮深矣凡此皆直書于策而義自見者也

六月齊

惠

人取濟西田

左傳為立公故以賂齊也公羊傳外取邑不書此何以書所以

賂齊也曷為賂齊為弑子赤之賂也殺梁傳內不言取言取受之也是為賂齊也程氏傳宣公不義得國賂齊以求助齊受之以助不義故書取不義不能保其土故不云我非為強取故不諱不能有而失者皆諱張氏曰濟西魯故地僖三十年取之曹者

魯人致賂以免討而書齊人取田者所以著齊罪

高郵

孫氏曰齊侯之罪隱而難見故明書取田以著其罪春秋取田邑皆貶之曰人罪其擅取也惟齊景為昭

公取鄆以其取不為已得時書其爵

春秋討賊尤嚴於利其為惡而助

之者所以孤其黨夫齊魯鄰國盟主之餘業也子惡

弑出姜歸而宣公立不能聲罪致討務寧魯亂

閔元齊仲

孫曰君其務寧魯難而親之

首與之會是利其為惡而助之也弑

君篡國人道所不容而貨賂公行免於諸侯之討則

天下胥為亂賊倫紀等于弁髦其禍乃自不知以義

為利而以利之可以為利而為之也孟子為

去聲

梁王

極言利國者必至於弑奪而後饜

反於艷

盖得經書取

田之意舉法如此然後人知保義棄利亂臣賊子孤

立無徒而亂少弭矣

張氏曰桓公篡立求援於鄭而誘以許田宣公奪嫡主齊以自

立而賂以濟田以利自固前後一轍使鄭莊齊惠不貪其利則桓宣必不能以自立矣曰假曰取蔽罪鄭齊誅其貪利而成亂也大學論治國平天下深戒以利為利孟子論先利後義不奪不廢皆拔本塞源知春秋之微意也歟家氏曰魯桓之弑君鄭不預也魯畏其討以是為賂故書假諱之也魯宣之弑君謀出於襄仲事實成於齊惠故直書其事以兩討之蓋田者先祖受之於王魯國之封疆也宣公既篡人之國又割先祖所受之土疆以為齊賂齊惠既輔人之篡又受其賂田以為已有此所謂盜竊之取其罪有大於侵伐之取矣陳氏曰外取邑不書襄二十六年齊取我高魚不書必有歸之者然後書是故濟西田書

取謹聞
書取

秋邾

定

子來朝

通旨凡經於朝聘皆不徒書未有書而無義者也宣公為弑君者所立邾子來

朝而無貶文者既於朝桓貶矣公羊曰其餘從同同張氏曰邾子朝當討之人不貶者桓公之經已舉法從同

同

○楚

莊

子鄭

穆

人侵陳

靈

遂侵宋

文左傳宋人之弑昭公也晉以諸侯

之師伐宋宋及晉平宋文公受盟于晉又會諸侯于扈將討齊皆取賂而還鄭穆公曰晉不足與也遂受盟于楚陳共公之卒楚人不禮焉陳靈公受盟于晉楚子侵陳遂侵宋穀梁傳遂繼事也

楚書爵而人鄭者貶之也鄭伯本以宋人弑君晉不

能討受賂而還以此罪晉為不足與也遂受盟于楚

今乃附楚以亟聲病中國何義乎

張氏曰不討有罪固晉之無義而亦

未至如僭王肆亂之罪大也鄭舍晉從楚附无王之狂楚以為中國患故人之書侵陳遂侵

宋者以見潛師掠境肆為侵暴非能聲宋罪而討之

也

家氏曰使鄭穆公從楚之後能以楚師討宋聲於境上問昭公之故宋人必能以鮑為戮更議立君

則不失其棄晉之初志今乃與楚子俱侵陳遂侵宋此侵暴無名之師凌駕中夏非討亂之舉也既

正此師為不義然後中國之師可舉矣

永嘉呂氏曰盟會而書楚

子自孟始征代而書楚子自侵陳始次厥貉嘗書楚子矣未加兵於中國也伐麇書楚子矣不過加兵於其與國也是故侵蔡伐楚侵曹伐衛書齊侯晉侯喜中國之有伯也侵陳遂侵宋書楚子傷中國之無伯

而楚人得以執伯權也陳氏曰書遂代楚言志不在蔡也書遂侵宋言志不在陳也南北之勢於是始也後十五年而宋楚平後五十年晉趙武楚屈建同盟于宋諸夏之君分為晉楚之從矣自是訖春秋師再有事無言遂者言遂者非與國伐盟主則盟主伐與國也

晉靈趙盾帥師救陳

靈左傳晉趙盾帥師救陳宋穀梁傳善救陳也

鄭在王畿之內而附僭亂陳先代帝王之後而見侵

逼此門庭之寇利用禦之者也

門庭門內之庭寇盜至此則不得不擊伐

之王者以諸夏為庭戶四夷為藩籬

晉能救陳則存諸夏邟與國之師

故特褒而書救凡書救者未有不善之也

啖氏曰救者救其患

難凡救患皆為美也如解倒懸孟子民之悅之猶解倒懸也如拯民於塗炭

之中

塗炭猶言水火如孟子言民以為拯已於水火之中知此義則知春秋用

兵之意矣傳

去聲

稱師救陳宋經不書宋此非闕文乃

聖人削之也前方以不能討宋上卿貶而稱人

文十七四

國伐

諸侯會而不序

同上會扈

今若書救宋則典刑紊矣

家氏曰書救與其能救陳也不書救宋不與其救宋也宋負弑君大惡晉人受賂不能討而楚伐之雖楚

之存心未必誠於為義然弑逆之賊夫人得而討之也楚討之晉救之故春秋不與其救與

宋公

文

陳侯

靈

衛侯

成

曹伯

文

會晉

靈

師于棗林伐鄭

穆公作裴林左傳會于裴林以伐鄭也楚為賈救鄭遇于北林囚晉解揚晉人乃還公羊傳此晉趙盾之師也曷為不言趙盾之師君不會大夫之辭也穀梁傳地而後伐鄭疑辭也此其地何則著其美也杜氏曰晉師救陳宋四國君往會之共伐鄭也裴林鄭地滎陽宛林縣東南有林鄉愚按在今汴梁路均州新鄭縣即裴也

列數

上聲下同

諸侯而會晉趙盾穀梁子以為大趙盾之

事以其大之也故曰師此說非也

劉氏曰卿大夫不得會公侯今晉侯

不行趙盾專國亦無恥則善矣曷為大之耶

春秋立法君為重而大夫與

師其體敵

據君不書帥師大夫必書帥師君獲君列傷皆不書師敗績大夫獲仍書師敗績

數諸侯於帥師之下而又書大夫之名氏則臣疑於

君而不可以為訓其曰會晉師此乃謹禮於微之意

也其立義精矣

陳氏曰此晉趙盾以諸侯之師伐鄭大夫初用諸侯也靈公之世兵車之

會自參以上貶人之於是出趙盾以其用諸侯也春秋不以大夫用諸侯故止書趙盾帥師救陳下書諸侯會晉師於棗林伐鄭則不以大夫用諸侯之辭也棗林鄭地也前者地而後

伐以為疑詞此其地則以著其美者

范氏曰歎美趙盾救災恤患之

功故詳錄其會地薛氏曰晉師先在棗林故言會又言伐

一美一惡無嫌於同

愚按

桓十五年公會宋公衛侯陳侯于袤伐鄭先講會禮而後往伐始疑於助忽而討突終乃伐忽而助突故春秋責其疑此言宋公陳侯衛侯曹伯會晉師于棗林伐鄭四國之君翕然而從晉師討罪以救患故春

秋著其美前者講會禮而後伐此乃會師以同伐文
似而實異也書突出奔蔡忽歸于鄭突入于櫟而繼
書公會諸侯于袤伐鄭則為黨突而伐忽可知矣書
楚子鄭人侵陳遂侵宋晉趙盾帥師救陳而繼書諸
侯會晉師于柴林則為討鄭而救
中國可知矣屬辭觀之是非瞭然

冬晉

靈

趙穿帥師侵崇

崇公作柳左本亦作崇侵書趙穿而後凡役書大夫左傳晉欲

求成於秦趙穿曰我侵崇秦急崇必救之吾以求成焉
趙穿侵崇秦弗與成杜氏曰崇秦之與國任公輔曰地
講商有崇國在京兆鄠縣日亭愚按今奉元
路鄠縣之東啖氏曰崇小國也公羊誤為柳

崇在西土秦所與也晉欲求成于秦不以大義動之

而伐其與國則為諛

許元反

已甚比諸伐楚以救江異

矣而傳

去聲

謂設此謀者趙穿也意者趙穿已有逆心

欲得兵權托於伐國以用其衆乎不然何謀之迂

音于

而當國者亦不裁正而從之也穿之名姓自登史策

弑君于桃園而上卿以志同受惡其端又見

音現下同

於

此書侵以見所以求成者非其道矣

高氏曰晉欲得秦而反加兵於

他人之國適足以衆晉之敵爾此謬計也家氏曰晉欲求成於秦發一乘之使述先君之好而秦成合矣

今伐崇以求之秦愈怒而兵愈不可解矣蓋穿者志於作難託伐崇以專兵不然何拙謀之若是而執政

者且無所可否於其間乎○劉氏曰公羊云柳者天子之邑也不繫乎周者不與伐天子也非也趙穿伐

天子之邑罪大矣
無文以貶之何哉

晉靈

人宋

人

伐鄭

穆左傳晉人伐鄭以報北林之役
於是晉侯侈趙宣子為政驥諫而

不入故不競於楚穀梁
傳伐鄭所以救宋也

宋人弑君既列於會在春秋衰世已免諸侯之討矣

論

去聲

春秋王法則其罪固在法所不赦也而晉人與

之合兵伐鄭是謂以燕

烟

伐燕

本蓋子言

晉無

庸愈

道與鄭無異

乎其書晉人宋人非將

去聲

卑師

少蓋

貶而

人之也

以

貶書伐者若曰聲罪致討而已有瑕則何以伐人矣

昭四無瑕者可以戮人高氏曰宋怨鄭與楚之侵也復請晉伐鄭晉亦以前救之無功也遂連兵伐之夫晉以貪賂致諸侯之叛不能退而自責乃謀動干戈於外以遂宋之復怨況宋人弑君豈可與之合兵乎家氏曰此一事而前後褒貶不同者鄭背晉而即楚諸侯會晉而討之公也晉受宋賂而輔之以篡今復偕宋伐鄭私也蓋鄭可伐也為宋而伐鄭則不可也

甲匡王六

二年

晉靈十四弑齊惠二衛成二十八蔡文五鄭穆二十一曹文十一陳靈七杞桓

三十宋文四秦共二楚莊七

春王二月壬子宋

文

華元帥師及鄭

穆

公子歸生帥師戰于大棘宋師敗績獲宋華元

華元反戰皆

書大夫帥師自此始左傳鄭公子歸生受命于楚伐宋宋華元樂呂御之戰于大棘宋師敗績囚華元獲樂呂

及甲車四百六十乘俘二百五十人馘百人宋人以兵車百乘文馬百駟以贖華元于鄭申入華元逃歸杜氏曰大棘在陳留襄邑縣南張氏曰今屬扶州愚按襄邑縣今屬汴梁路睢州

兩軍接刃主將

去聲下同

見獲其負明矣又書師敗績詞

不贅乎此明大夫雖貴與師等也

永呂嘉氏曰此年戰大棘與晉趙鞅

鄭罕達戰于鉄皆兩稱帥師其衆敵也春秋書戰言大夫帥師自此始自是而後若晉荀林父衛孫良夫

魯季孫行父臧孫許叔孫僑如公孫嬰齊齊國書皆書大夫帥師春秋書獲者七唯齊國書及此年宋華

元書敗績者身見獲而師又敗也大夫生死皆書故曰獲鄭獲宋華元生也吳獲陳夏馮齊國書死也

將尊師少稱將不稱師師衆將卑稱師不稱將將尊

師衆並書于策者示人君不可輕役大衆又重將帥

之選其義深矣

前晁錯傳卒不可用以其將與敵也君不擇將以其國與敵也

或曰

元帥三軍之司命而輕重若是班乎

孟子若班乎孟子曰班齊等

之自行師而言則以元帥為司命

孫子將者人之司命國家安危之主

也自有國而言則以得衆為邦本

書五子之歌民惟邦本

鄭使

高克將兵禦狄于境欲遠

去聲克也而不恤其師

見閔二

楚以六卒實從得臣恐喪

去聲師也而不恤其將

見僖二十

八故經以棄師罪鄭以殺其大夫責楚明此義然後

知王者之道輕重之權衡矣

高氏曰元年秋鄭人與楚子侵宋宋人既為巢

林之役以報之是冬又與晉人伐鄭一役而兩報之遂起此役今鄭師之來宋當明大義以諭之否則慎固封守使鄭不得而犯焉華元乃遽帥師出與之戰於是三軍大敗以至見獲不能效死徒殄民辱國而已以見中國因夷狄之故而自相殘如此張氏曰宋以弑君致寇而不服罪故書宋及猶曰華元為志乎是戰也愚按文定於韓之戰云書伐書及者兩俱有罪經不書伐專罪晉也今考此亦不書歸生伐宋則春秋責宋之意重於責鄭矣○趙氏曰穀梁云盡其衆以救其將以三軍敵華元華元雖獲不病矣按兵敗身獲而云不病非也但緣師先敗績身乃見獲依次第書之有何褒貶乎若欲褒貶乃足見其不身先得云善矣

秦共師伐晉靈

按左氏以報崇也遂圍焦

杜氏曰焦晉河外邑

晉用大夫於崇

乃趙穿私意而無名也故書侵秦人為去聲是興師而

報晉則問其無名之罪也故書伐世豈有欲求成於

強國而侵其所與可以得成者乎穿之情見

音現下同矣

宣子當國筭無遺策獨慴

模揔反閤也

於此哉其從之也

而盾之情亦見矣春秋書事筆削因革必有以也一

侵一伐而不書圍焦所以著晉卿上侵之意其所由

來者漸矣

永嘉呂氏曰晉文之欲與楚爭也必得秦而後敢戰轂函之役晉衰度淺而先軫諸

人見利乘便自是更相報復無有窮已楚方有凌駕中國之心鄭復背晉從楚以侵陳晉將與楚爭則通秦以軋楚可也否則置秦而勿問可也而盾之族子與侵崇之謀盾非病狂何故聽之是啓秦之爭也宋方敗於鄭而晉復病於秦非自致之而誰耶張氏曰欲求成而反召兵所以深著趙穿之妄動干戈而欲竊兵權誅其意也

夏晉

靈

人宋

文

人衛

成

人陳

靈

人侵鄭

穆左傳晉趙盾救焦遂自陰地

及諸侯之師侵鄭以報大棘之役楚閻叔救鄭曰能欲諸侯而惡其難乎遂決于鄭以待晉師趙盾曰彼宗競于楚殆將斃矣姑盜其戾乃去之

按左氏晉趙盾及諸侯之師侵鄭以報大棘之役初

鄭歸生受命于楚以伐宋經不書伐而以宋華元主

大棘之戰者蓋楚人有詞于宋矣師之老壯在曲直

僖二晉主夏盟盾既當國合諸侯之師何畏乎楚何

避乎闢叔然力非不足而去之者以理曲也故卿不

氏而稱人杜氏曰鄭為楚伐宋獲其大夫晉趙盾與諸侯之師將為宋報壯畏楚而還失伯者

之義故師書侵而不言伐易於訟卦之象曰君子作

事謀始程子傳人情有爭訟之道凡所作事必謀其始若慎交結之類絕弊端於事之始則爭訟

無由始而不謀將至於興師動衆

文王卦序師次於訟

有不能

定者矣晉惟取賂釋宋而不討至以中國之大不能

服鄭不競於楚可不慎乎春秋行事必正其本為

去聲

末流之若此也其垂戒明矣

永嘉呂氏曰諸侯之從晉也謂晉之可依也率

諸侯以討宋乃立公子鮑而還是立賊也鄭由是謂晉為不足與而從楚以侵宋晉乃莠宋以伐鄭鄭復使歸生伐宋蓋有辭於宋也晉復黨宋以侵鄭一動之非義而與國叛之敵國侮之彼得以奉辭而我罷於奔命至一再而未已也伯主之舉動詎可輕哉家氏曰鄭叛華侵之可也以報大棘之役則不可也鄭惡晉之釋宋不討而從楚晉不知自愧猶為宋報鄭是以貶四國之大夫皆書人是時晉之趙盾欲據兵

權託於伐國實無關心故樂林之役楚因解揚晉師
即還是役也與閭叔遇即謬為之辭曰彼宗競於楚
殆將斃矣復去之盾本無欲戰之心也左氏乃曰晉
侯侈趙盾驟諫不入是以不競於楚何失實之甚耶
高氏曰自是楚與晉爭晉不能競反有弑逆
之禍於是楚益自肆明年遂有問鼎之事

秋九月乙丑晉趙盾弑其君夷臯

臯公作彗左傳晉靈公不君厚斂以雕牆

從臺上彈人宣子驟諫公患之使鉏麇賊之不果觸槐
而死晉侯飲趙盾酒伏甲將攻之其右提彌明知之趨
登曰臣侍君宴過三爵非禮也遂扶以下公嗾夫獒焉
明搏而殺之閭叔出提彌明死之靈輒與為公介倒戟
以禦公徒而免之趙穿攻靈公于桃園宣子未出山而
復太史書曰趙盾弑其君以示於朝宣子曰不然對曰
子為正卿亡不越竟反不討賊非子而誰孔子曰董狐
古之良史也書法不隱宣子使趙穿逆公子黑臀于周

而立之公羊傳親弑君者趙穿也曷為加之趙盾不討賊也靈公為無道使諸大夫皆內朝處乎臺上引彈而殛之膳宰熊蹯不熟公怒殺之使荷舂棄之盾就視之趨而入諫靈公心忤焉欲殺之伏甲于宮中召盾食之已食公謂盾曰吾聞子之劍蓋利劍也示我吾將觀焉盾將進劍祁彌明呼之盾踣階而走公呼樊而屬之彌明跋之絕其領宮中甲鼓而起有起于甲中者抱盾而乘之驅而出趙穿緣民衆不說起弑靈公然後迎趙盾而入與之立于朝晉史書曰晉趙盾弑其君盾曰天乎無辜吾不弑君誰謂吾弑君者乎史曰爾為仁為義人弑爾君而復國不討賊非弑君如何穀梁傳穿弑也盾不弑而曰盾弑何也以罪盾也靈公朝諸大夫而暴彈之觀其辟尤也趙盾入諫不聽出亡至於郊趙穿弑公而後反趙盾史狐書賊曰趙盾弑公盾曰天乎予無罪孰為盾而忍弑其君者乎史狐曰子為正卿入諫不聽出亡不遠君弑反不討賊則志同志同則書重非子而

誰改書之曰晉趙盾弑其君夷臯者過在下也程子曰趙穿弑君人誰不知若盾之罪非春秋書之更無人知也

趙穿手弑其君董狐歸獄於盾其斷

都亂反下同

盾之獄

詞曰子為正卿亡不越竟反不討賊以書是斷而盾也受其惡而不敢辭仲尼因其法而不之革其義云何曰正卿當國任事之臣也國事莫酷於君見弑不

於其身而誰責乎

薛氏曰君將殺盾而穿行弑君之事則主弑者盾也穿受命而加刃

者也在律家人共犯止坐尊長威力使令被使為從此春秋之義也亡而越境謂去國

而不還也然後君臣之義絕

杜氏曰越境則君臣義絕愚按君子違不適讎

國未臣而有伐之奔命焉死之可也去國不返必如宋子哀潔身去亂然後君臣之義絕反而討

賊謂復讎而不釋也然後臣子之事終

愚按反而討賊苟如羽父

討於竊氏不足以逭大惡之誅必如衛石碯之誅不避親無一毫阿私之意而竭力為君復讎然後臣子

之事不然是盾偽出而實聞乎故也假令不與音聞

者而縱賊不討是有今將之心

本公羊何氏曰今將欲弑

而意欲

穿之成乎弑矣惡莫慘乎意今以此罪盾乃聞臣子

之邪心而謹其漸也盾雖欲辭而不受可乎

蜀杜氏曰盾知

靈公欲殺之而心欲弑之是不止同謀而實將弑也春秋不可並書穿盾而擇首罪者以書之亦義之所宜也臨川吳氏曰趙盾專晉國之政幾二十年境內境外知有盾而不知有公靈公既長不堪其專遂欲殺盾鉏麇受命不肯殺盾而死提彌明救盾而閻死靈輒內叛倒戟免盾於死則盾之私屬與公徒敵無復有臣禮矣君臣既為仇敵非盾弑公則公殺盾勢固不兩立也穿盾之族子平日所愛信之人也弑公而盾乃復穿之弑為盾弑也盾為首惡穿特承意行事者爾盾陽為不知謀以求自免弑君之罪將誰欺乎夫子書曰趙盾弑其君誅首惡也自三傳以來說者多方為盾分釋則是亂賊不可以欺聖人而乃可以欺後儒也高郵孫氏曰盾陰弑其君而陽逃其迹實行其計而穿受其名者也故孔子以弑賊誅之必待親弑然後罪之則奸臣賊子得以高貴鄉公之計免而庸愚無知者常當其實矣

事觀焉抽戈者成濟唱謀者賈充而當國者司馬昭也為天吏者將原司馬昭之心而誅之乎亦將致辟成濟而足也故陳泰曰惟斬賈充可以少謝天下耳

昭問其次意在濟也泰欲進此直指昭也

魏高貴鄉公紀帝見

威權日去不勝其忿曰司馬昭之心路人所知也吾不能坐受廢辱遂率殿中宿衛官僮數百鼓噪而出中護軍賈充逆戰南閣下太子舍人成濟問充曰當如何充曰司馬公蓄養汝等正為今日濟抽戈刺帝刃出於背昭聞之大驚自投於地入殿中召羣臣會議尚書左僕射陳泰曰獨有斬賈充可以少謝天下耳昭久之曰更思其次曰泰意惟有進此不知其次昭乃不復言以太后令追廢帝為庶人昭言成濟大

逆不道然則趙穿弑君而盾為首惡春秋之大義明夷三族

矣微夫子推見至隱垂法後世亂臣賊子皆以詭計

獲免而至愚無知如史太鄧扈樂

音洛

之徒皆蒙歸獄

而受戮焉

公羊閔元莊公存之時僕人鄧扈樂曹淫于宮中子般執而鞭之莊公死慶父謂樂

曰般之辱爾國人莫不知孟弑之矣使弑子般然後誅樂而歸獄焉唐昭宗紀上至洛陽宋全忠以帝有

英氣恐變生於中乃遣李振與蔣玄暉及宋友蔡氏叔琮等圖之玄暉選牙官史太等百人夜叩宮門殺

宮人裴貞一帝在椒殿遽起繞柱走太追弑之昭儀李漸榮以身蔽帝太亦殺之玄暉矯詔稱貞一漸榮

弑逆全忠開之陽驚哭自投于地曰奴輩負我令我受惡名於萬代至東都慟哭殺宋友蔡氏叔琮恩按

趙盾之專晉猶司馬昭宋全忠之專政於魏唐也靈公之欲殺盾猶高貴鄉公之欲殺司馬昭唐昭宗之謀宋全忠也趙穿弑靈公猶成濟師太之弑高貴鄉公與昭宗也盾未出山而復猶昭全忠之陽驚自投於地也魏唐舊史及通鑑皆書成濟史太弑帝而邵子經世書及朱子綱目則筆之曰魏司馬昭弑其主髦宋全忠弑帝蓋取法春秋誅趙盾之義也司馬昭族誅成濟宋全忠盡殺友恭叔琮等尚不免君子直筆之討況盾使穿逆成公于周以固新君臣父子不君之寵則元惡之誅不於盾而誰任乎君臣父子不相夷以至於禽獸也幾希故曰春秋成而亂臣賊子懼通旨夷皋雖無道未為獨夫君臣之分猶在也知此則明文王事紂之道○異姓之卿君有大過則諫反覆之而不聽則去趙盾亡而不反可也反而討賊亦可也盾能討穿司馬昭能討賈充則可免弑君

之罪矣故曰春秋誅意二人之不討罪意在於弑君也家氏曰晉襄託其孤於趙盾曰此子也才吾愛子之賜不才吾惟子之怨其屬於盾者為何如盾乃與諸大夫謀外求君及畏逼不得已而後立靈公則靈公之立非盾意也竊疑盾所以謀其君者非一朝一夕之故矣齊商宋鮑弑君篡國晉為盟主所當治也盾合諸侯將有討於齊宋已而受賂不惟不討又為之定篡竊之位無君之心久已萌矣堂上之覺方興桃園之攻隨至靈公固在趙氏置網之內欲無及得乎○趙氏曰左氏云仲尼曰惜也越境乃免按董狐云亡不越竟言行未遠而君被弑反又不討賊狀涉同謀爾非謂越竟即無罪也作傳者不達此意遂傳會為此言若然者奸臣令人弑君身越竟而還即為無罪乎朱子語左氏見識甚卑云孔子曰惜哉越竟乃免如此則專是回避占便宜者得計聖人作春秋而亂臣賊子懼豈反為之解免耶

冬十月乙亥天王崩

匡王也文十五年即位
位六年弟瑜立是為定王

乙定王三年

晉成公黑臀元年齊惠三衛成二十九蔡
文六鄭穆二十二卒曹文十一陳靈八杞

桓三十一宋文五
秦共三楚莊八

春王正月郊牛之口傷改卜牛牛死

乃不郊

公羊傳其言之何緩也曷為不復卜養牲養二
卜帝牲不吉則扳稷牲而卜之帝牲在於滌三

月於稷者唯具是視郊則曷為必祭稷王者必以其祖
配穀梁傳之口緩辭也傷自牛作也改卜牛牛死乃不
郊事之變也乃者
亡乎人之辭也

乃不郊為

去聲下
為天同

牛之口傷

穀梁全曰牲傷
曰牛未牲曰牛改卜牛

而牛又死也

家氏曰此魯宣除喪始郊而天示之譴
也一書十有六言辭煩而不厭著其變

異乎常郊之卜不吉者矣宣公篡不然郊矣范氏曰牛

弑逆理亂常持是饗帝故天譴之也

無故其口自傷易牛禮為天王服斬衰周禮司服凡

改卜復死乃廢郊禮禮為天王斬衰喪為天王斬

周人告喪于魯史策已書而未葬也祀帝于郊夫

豈其時而或謂不以王事廢天事杜氏注禮乎張氏曰此因事

之變以明魯郊之非禮蓋僭禮之中復有忘哀從吉

之罪三年之喪乃臣子斬衰奔赴之時豈可僭天子

越紼行事之禮春秋春秋已來喪紀浸廢有不奔王喪

而遠適他國桓公不奔桓王喪而會于齊之艾文公

成公不奔頃王定王之喪而同盟于鄭

之新城蟲牢襄公不奔靈王之喪而有不修弔禮而

如楚且送楚子昭之葬于西門之外

自相聘問

簡王之喪襄公不弔而邾子來朝衛剽晉荀瑩來聘

固將以是為可

舉而不廢也卒至漢文以日易月

前文帝紀遺詔曰死者天地之理物

之自然奚可甚哀當今之世咸重服以傷生吾甚不取朕幸以天年得供養于高廟其奚哀念之有其令天下吏民令到出臨三日皆釋服毋禁嫁娶祠祀殿中當臨者皆以旦夕各十五舉聲已下服大紅十五日小紅十四日纖七日釋服度云皆當言大功小功布也纖細布也應劭曰紅者中祥大祥以紅為領緣織者禪也凡三十六月為釋服此以日易月也顏師古曰紅與功同此文帝自率已意創而為之非有取於周禮何為以日易月乎三年之喪其實二十七月豈有三十六月之文禪又無七月也應氏既失之於前而近代因循謬說未之思也荀悅曰三年之喪天下之通喪由來者尚矣今而廢之以虧大化非禮

也後世不能復其所由來漸矣春秋備書其義自見

音現高氏曰魯僭郊禮久矣隱桓莊閔不書者聖人不敢無故斥言君父之過故因變異而書也愚按天王崩三月天下服王崩至是已三月海內諸侯皆當斬衰直經杖絞帶冠絕纓管屨魯為同姓之宗國而不服其服則無王也郊之祭也喪者不敢哭凶服不敢入國門苟釋去服而從事於大禮是慢天也且天子嘗禘郊社蠶籩既陳諸侯祭社稷俎豆既陳聞天子崩后之喪皆廢其禮況可聞喪而猶治祭事乎王制所紀祭天地社稷越縞而行事亦以已卜時日而忽有喪則大臣越縞而攝祭耳春秋書郊牛災而改卜者四此年改卜之牛又死成七年饑鼠傷郊牛改卜之牛故皆廢郊定十五年哀元年饑鼠傷郊牛改卜牛而不復變異皆行郊禮故知不郊者非悔非禮而不郊實以郊牛之蹇有災傷不得已而不郊特書乃

不郊猶言乃還乃復乃克葬乃者繼事之辭所以著不郊之由係於郊中之變異也經書不郊者四成十年襄十一年皆以下不吉而廢郊則魯君之誠意不足以格天此年成七年牛災廢郊而皆猶三望則天示譴告之意而不知止也

猶三望

左傳不郊而望皆非禮也望郊之屬也不郊亦無望可也

三望者公羊曰祭泰山河海夫天子有天下凡宇宙之內名山大川皆其所主也故得祭天而有方望無所不通諸侯有一國則境外之山川他人所主者而可以望乎季氏旅於泰山

周禮大宗伯旅四望注旅陳也陳其祭事

冉求

不能救而夫子責之者為去聲泰山魯侯所主也大夫

何與預音焉季氏不得旅泰山則河海非魯之封內其

不得祭亦明矣

朱子語天子祭天地諸侯祭其國之山川只緣是他屬我故我祭得他若

不屬我則氣便不與之相感如何祭得他猶者可已不當為之詞

詳見傳三十一

年臨川吳氏曰天子郊祀上帝必望祭山川望祭在郊祀之後因郊而望也魯諸侯也以成王之賜許用王禮四望闕其一殺於天子然郊社既廢則望禮可以不舉魯既不郊而猶三望故書以譏其非禮愚按襄七年三卜不吉而免牲十一年成十年四卜五卜不吉而不郊雖曰不郊非其本意然因是而止猶庶幾焉僖公末年免牲猶三望此年成七年不郊猶三望可已不已不當為而為其過益甚矣

葬匡王

四月而葬王室不君其禮略也

高氏曰前期而葬者簡也且著王室之微

罪諸侯之不王也家氏曰桓王七年而後葬譏緩也匡王四月而亟葬譏速也

微者往會魯

侯不臣其情慢也或曰宣王親之者也而常事不書

劉氏意林非矣崩葬始終之大變豈以是為常事而不書

也

永嘉呂氏曰經書王崩而葬者四葬桓王葬匡王則不書其人葬襄王則叔孫得臣也葬景王則叔

鞅也或謂桓王匡王之葬皆公親往然以他文考之葬諸侯而使卿者則備而書之其他不書其人者皆

為公親往可乎

楚子

莊

伐陸渾之戎

渾戶門反公作賁渾戎後同殺無之字左傳楚子伐陸渾之戎遂至

於雄觀兵于周疆定王使王孫滿勞楚子楚子問鼎之大小輕重焉對曰在德不在鼎周德雖衰天命未改鼎

之輕重未可問也杜氏曰允姓之戎居陸渾在秦晉西北僭二十二年秦晉遷之于伊川遂從戎號全為陸渾

縣張氏曰唐為河南陸渾縣地今河南府伊陽縣北二十里有陸渾縣故城愚按今河南府洛陽縣

外國相攻不志

據大十六戎伐楚哀四楚克夷虎圖蠻氏之類經皆不書

此其志

何也為

去聲

陸渾在王都之側逼處畿甸族類之不分

也楚又至洛觀兵于周疆問鼎之大小輕重焉故特

書于策以謹中外之辨禁啟亂之階

陳氏曰楚伐陸渾窺周室也

夏楚

莊

人侵鄭

穆左傳晉侯伐鄭及邲鄭及晉平士會入盟楚人侵鄭鄭即晉故也

按左氏晉侯伐鄭鄭及晉平而經不書者仲尼削之

也

愚按後此七年鄭及晉平八年陳及晉平經皆不書惟十五年宋及楚平則書之不與中國之服於

夷狄也

鄭本以晉靈不君取賂釋賊為不足與似也

孟本

予言所為近似有理

而往從楚非矣今晉成公初立背

音僭竊

偽邦而歸諸夏則是反之正也春秋大改過許遷善

書楚人侵鄭者與鄭伯之能反正也故獨著楚人侵

掠諸夏之罪爾鄭既見侵於楚則及晉平可知矣

家氏

曰晉靈惟貨是徇是以失鄭成公繼世雖未有大過人而鄭速棄異即同蓋貴華賤夷人心義理之同然非威驅勢迫所能得也不然趙盾合諸侯之師以伐鄭略無成功今息兵踰年鄭何為而自至于春秋繼伐陸渾而書楚人侵鄭惡楚莊圖霸之急也

秋赤狄侵齊

惠赤狄始見經張氏曰赤狄狄之之赤狄白狄俗尚赤衣白衣也地譜涖州

春秋赤狄之地愚按在今廣平路高氏曰見狄之種類已分矣襄陵許氏曰楚侵其南狄侵其北此中國棟橈之時也

○宋

文師圍曹

文左傳宋師圍曹報武氏之亂也

按左氏宋文公即位盡逐武穆之族二族以曹師伐

宋

文十八武氏之族道昭公子將奉司城須以作亂公殺母弟須及昭公子使戴莊桓之族攻武氏遂

出武穆之族

然不書于經者二族以見逐而舉兵非討罪

也及宋師圍曹報武氏之亂而經書之者端本清源之意也武穆二族與曹之師奚為至於宋哉不能反躬自治恃衆強以報之兵革何時而息也宋惟有不赦之罪檀弓臣弑君凡在官者殺無赦莫之治也故書法如此高氏曰武氏之亂非曹人所致也宋不能內睦九族而興兵以圖人之國不亦左乎

冬十月丙戌鄭伯蘭卒

穆公也在位二十二年子夷嗣是為靈公

葬鄭穆公

穆公作繆臨川吳氏曰葬速禮不備也

丙定王四年

晉成二齊惠四衛成三十蔡文七鄭靈公夷元年弒曹文十三陳靈九杞桓三十二

宋文六秦共四卒楚莊九

春王正月公及齊侯平莒惠及郕莒人

不肯公伐莒取向

向舒亮反左傳非禮也平國以禮不以亂伐而不治亂也以亂平亂何治

之有無治何以行禮穀梁傳及者內為志焉爾平者成也公伐莒取向伐猶可取向甚矣莒人辭不受治也伐莒義兵也取向非也乘義而為利也杜氏曰向莒邑張氏曰郕已姓國秦有郕郡漢屬東海郡故城在今淮陽軍

邳縣北愚按今淮安路海寧州

心不偏黨之謂平

愚按偏則不中黨則不公無一以毫私欲而後可以稱物平施也

此心平物者物必順以此心平怨者怨必釋惟小人

不能宅心之若是也雖以勢力強

上聲下能強同

之而有不

獲成者矣夫以齊魯大國平邾莒小邦宜其降心聽

命不待文告之及也然而莒人不肯則以宣公心有

所私係失平怨之本耳故書取以著其罪

高氏曰莒邾相怨而

邾乃魯婚姻之國公欲為邾平莒而挾齊以為重公

之義不足以服莒之心不知自反而取邑於人亦已

甚矣公既無以得莒後書邾伯及所欲也王氏曰及

邾來歸則邾亦不能固其好也齊公之志也及平者成也取者盜也不肯者心弗允

從莫能強之者也以利心圖成雖強大不能行之於

弱小春秋書此戒後世之不知治其本者故行有不

得者反求諸已斯可矣

劉氏曰兩怨相仇能辨其曲直使人信之者唯已有道也

小邾射以邑歸魯魯使大夫盟之辭曰使子路約從無所用盟千乘之國不信其盟而信子路之一言子路可謂能以言信矣推子路之心居邾莒之間安有不聽者哉使子路動而違義言而廢信不可以決鄉黨之平況千乘之國乎家氏曰事有大而書之略事有小而書之詳此書公及齊侯平莒及邾莒人不肯公伐莒取向辭繁而不厭示後人以持平救偏正義辨利之要夫莒邾所以爭為不平故耳齊魯求其平高者抑之下者舉之以我之平而平彼之不平庶乎其可也而魯之於莒積不相下徒狹齊人之威力而要莒以必從其不肯者宜哉宣公遽以兵加莒而取其一邑以已之不平求人之平况又因以為利無道

甚矣以濟西賂齊而責償於莒春秋首書公及而終之以取向深責之也通旨凡書侵伐多不言其所事愚按晉陽處父伐楚先言伐而後言以救江宣公伐莒先言平莒不肯而後言伐皆指言其事然救江雖非其道而其名則善平莒之名雖善以不肯而至於伐取則又甚焉屬辭比事春秋之權衡見矣○啖氏曰公羊云其言不肯何辭取向也聖人設教豈為魯欲取向而妄加莒事乎趙氏曰穀梁云弗肯者可以肯也按書不肯者明莒非以他事見伐且譏公又曰伐莒義兵也按非王命又非侯伯安得稱義乎

秦伯稻卒

共公也在位四年子榮嗣是為桓公

○夏六月乙酉鄭公子歸

生弑其君夷

左傳楚人獻龜於鄭靈公公子宋與子家將見子公之食指動以示子家曰他日我如

此必嘗異味及入宰夫將解龜相視而寢公問之子家以告及食大夫龜召子公而弗與也子公怒染指於鼎

嘗之而出公怒欲殺公子公與子家謀先子家曰畜老猶憚殺之而况君乎反譖子家子家懼而從之弑靈公書曰鄭公子歸生弑其君夷權不足也君子曰仁而不武無能達也

首謀弑逆者公子宋也懼譖而從之者歸生也而以歸生為首惡何也夫亂臣賊子欲動其惡而不從者未有能全其身而不死也故季子然問仲由冉求其從之者歟子曰弑父與君亦不從也是以死節許二子矣

南軒張氏曰弑君父不從何必由求而能之曾不知順從之臣始也惟利害之徇履霜堅冰之

不戒馴致蹉跌以至從人弑逆者多矣

歸生懼譖而從公子宋特無求

路不可奪之死節耳書為首惡不亦過乎曰歸生與宋並為大夫乃貴戚之卿同執國政可以不從一也嘗統大師與宋戰獲其元帥

二年戰天
棘獲華元

已得兵權可

以不從二也聞宋逆謀登時而覺先事誅之猶反手耳夫據殺生之柄仗大義以制人使人聽已猶犬羊之伏於虎也何畏於人懼其見殺而從之也哉計不出此顧以畜老憚殺比方君父歸生之心悖矣故春秋捨公子宋而以弑君之罪歸之為後世鑒若司馬

亮沈慶之等苟知此義則能討罪人不至於失身為

賊所制矣

晉惠帝紀賈后專恣殺太傅楊駿廢太后楊氏微汝南王亮為太宰亮欲悅衆論誅

楊駿功侯者千八十一人亮權勢日盛賈后欲奪其權使楚王瑋夜圍亮府殺之南沈慶之傳慶之既發顏師伯柳元景之謀遂昵子業蔡興宗勸慶之弑子業不從及子業誅何邁量慶之必入諫閉諸橋絕之慶之果往不得進而還乃使沈攸之賜藥酒殺之陸氏曰子公弑君之賊也其惡易知子家縱其為逆罪莫大焉書之以為首惡所以教天下之為人臣者也春秋之作聖人本以明微蓋謂此也與書趙盾之弑義同高氏曰春秋之作常施於可疑而不施於所不疑宋之罪無疑也歸生或疑於可疑故以治歸生則宋罪自見非重歸生而輕宋也陳氏曰歸生為正卿而宋有無君之心非歸生孰禁之於歸生乎謀先然

而弗禁則賊由歸生而已矣故歸生之弑公子宋啓之不以罪宋而罪歸生張氏曰歸生位為上卿久執大權國事由已乃不能鎮服奸邪遏絕萌蘖又脅於邪謀撓而從之位尊責重故春秋定為戎首以戒大臣不能持正而阿附惡人者所以示國討之法而明事君之義也永嘉呂氏曰宋欲弑而不敢發先以語歸生則歸生必有以制其可否之勢勢在歸生而輕以徇人其為首惡宜矣臨川吳氏曰左傳所載事蹟猥陋疑不可信蓋歸生貴戚之卿東國重權嗣君新立必有所不獲於其君者因宋之有邪謀陽為畜老憚殺之言陰實假手於宋以除其君此亂臣之首而宋特其從也愚按十年傳載鄭人討幽公之亂斷歸生之棺而逐其族則鄭人當時已以歸生為首罪矣

赤狄侵齊

惠高氏曰以齊之強而連年為狄所侵則惠公之無政可知矣

○秋公如齊

惠

公至自齊

君行告至常事不書宣公比

毗志反下同

年如齊而皆致

者危之也

此年明年九年十年四朝齊十年又弔齊惠公之喪皆書至張氏曰危之者與桓二

年公至自唐同意

夫以篡弑謀於齊而取國

遂得臣如齊

以土地

賂齊而請會

齊取濟西田會平州

以卑屈事齊而求安

高氏曰公始即

位公子遂季孫行父一歲而三聘齊至是亟朝於齊謹事大國以自固也

上不知有天王

下不知有方伯惟利交是奉而可保乎高固之事亦

殆矣故比年如齊而皆致以戒後世之欲利有攸往

者惟義之與比為可安耳

愚按宣公以篡得國上不畏司馬九伐之誅下不畏

鄰國大夫沐浴之請固以始謀於齊繼薦賄焉而惠公援之甚力為足恃也而不知彼能制吾死生之命安危榮辱係於齊君大夫頻笑之頃明年高固使齊侯止公宣公得不甚懼矣乎盟會之書至始於桓公之盟唐桓公大國而屢書至始於宣公之如齊春秋蓋危桓公之不得返而又嘆其不見討也

冬楚子

莊

伐鄭

襄左傳鄭未服也杜氏曰前年楚侵鄭不獲成故曰未服高氏曰中國諸侯不

問鄭國弑君之罪而楚子與兵以討之所以病中國也張氏曰楚自去年至十年侵伐鄭者凡五至十一年盟鄭辰陵而鄭又徵事晉於是明年圍鄭入之遂敗晉於邲而後鄭復楚晉之不振有自來矣王氏曰三年楚侵鄭稱人此年伐鄭復稱爵何也三年所伐者穆公也此年所伐者襄公也穆公捨楚歸晉則討之為無名襄公

為弑君者所立不討賊盟主不能問而楚莊伐之是中國之君不若蠻荆之知類矣故曰進楚子所以傷中國也

丁定王五年

晉成三齊惠五衛成三十一蔡文八鄭襄公堅元年曹文十四陳靈十杞桓三十二

宋文七秦桓公

榮元年楚莊十春公如齊

惠夏公至自齊

左傳書過也杜氏曰往朝

見止厭尊毀列辱其先君而於廟行飲至之禮故書以示過恩按宣公五如齊唯此年踰時始返經雖諱止公之跡而比事觀之其實亦不可揜矣然則宣公之朝齊皆有危殆之憂而此行尤甚也

○秋九月

齊

惠

高固來逆子叔姬

左無子字左傳齊高固來逆女

自為也故書曰逆叔姬卿自逆

也穀梁傳諸侯之嫁子於大夫主大夫以與之來者接內也杜氏曰適諸侯稱女適大夫稱字所以別尊卑也

不書女歸
降於諸侯

按左氏公如齊高固使齊侯止公請叔姬焉

杜氏曰留公強

成書夏公至自齊秋齊高固來逆子叔姬

莊二十七年傳大夫

非君命不越境齊高固莒慶以大夫即魯而圖昏備書以示譏

罪宣公也其曰來者

以公自為之主

范氏曰來者謂高固固齊之大夫而與君接婚姻之禮

稱子者

或謂別

筆列反

於先公之女也

趙氏曰時君之女故加子字以別姑姊妹愚按

春秋書子叔姬者三餘不書子恐非皆姑姊妹

諸侯嫁女於大夫主大夫以

與之者為

去聲體敵也范氏曰婚禮主人設几筵于廟以待迎者諸侯大夫尊卑不敵

故使大夫為主

而公自為之主壓

於涉反或作厭損也

尊毀列卑朝

廷慢宗廟矣夫以鄭國褊小楚公子圍之貴驕強大

來娶于鄭子產辭而卻

與却同

之使館于外欲野賜之

幾不得撫有其室

昭元楚公子圍聘于鄭且娶于公孫段氏將入館鄭人惡之使子羽

與之言乃館于外既聘將以東逆子產使辭曰以敝邑褊小不足以容從者請瑱聽命令尹使對曰君辱

既寡大夫圍謂圍將使豐氏撫有而室若野賜之是委居既於草莽也

而宣公以魯國

周公之後逼於高固請婚其女強

上聲委禽焉

昭元公孫黑強

委禽焉注禽鴈也納采用鴈

而不能止惟不知以禮為守身之幹

是以得此辱也春秋詳書為後世鑒欲人之必謹於

禮以定其位不然卑巽妄說

音悅曲禮禮不妄悅人

不近於禮

奚足遠

去聲

恥辱哉

論語恭近於禮遠恥辱也高氏曰

高固之娶叔姬之嫁齊許之來魯

與之婚皆非禮也家氏曰閭巷之人為強有力者魯之而昏且猶不受況於堂堂之侯國乎魯而求昏已為不可而又以大夫伉禮於國君所以陵暴魯國者甚矣宣公用齊之力篡弑得國固不以是為辱魯之宗社重為之辱矣嗚呼以千乘之國涕出而女於吳且猶羞之而況於女鄰國之大夫者乎春秋書之責魯也責齊也正高固陵犯之罪也臨川吳氏曰宣公負篡國之罪倚齊以安數朝數聘卑身事齊猶以為未甚至齊之臣強娶其女甘心與之而不敢違自為之主如敵體然蓋身為不義故忍恥忍辱而屈於人

下如此曹子臧吳季札強與之國義不肯受不降其志而常伸於人上者果何人哉。劉氏曰穀梁云不正其接內故不與夫婦之稱非也。不曰逆女別於逆君夫人者也。

叔孫得臣卒

莊叔也子僑如嗣是為宣伯

內大夫卒無有不日者以春秋魯史也其或不日則

見音現恩數之略爾仲遂如齊謀弑子赤叔孫得臣與

之偕行

文十八

在宣公固有援

如字

立之私其恩數豈略

而不書日是聖人削之也君臣父子妃妾適

音嫡

庶人

道之大倫也方仲遂以殺適立庶往謀於齊而與得

臣並使

去聲下同

也若懵

模揔反

然不知其謀或知之而不

能救則將焉

音煙

用彼相

去聲

矣春秋治子赤之事專在

仲遂以其內交宮禁外結強鄰大惡無所分也而叔

孫得臣有同使于齊之罪故特不書日以貶之若曰

大夫而不能為有無者不足以恩數云爾

何氏曰不日者

○知公子遂欲弑君為人臣知賊而不言明當誅
○程子隱元傳大夫卒或日或不日因舊史也

冬齊

惠

高固及子叔姬來

穀梁傳及者及吾子叔姬也為使來者不使得歸之意也

左氏曰反馬也禮嫁女留其送馬不敢自安及廟見

現成婦遣使

音去聲

反馬

本杜氏注孔氏正義天子諸侯嫁女留其乘車高固反馬則大

夫亦留其車留車妻之道也反馬婿之義也婦至質明見於舅姑若舅姑既沒則婦入三月乃祭因以三月為反馬之節舅姑存者亦當以三月反馬也則高法當遣使不合親行故經傳具見其事以示譏

固親來非禮也又禮女子有行遠

去聲

父母者歲一歸

寧

何氏曰大夫妻歲一歸寧

今見逆逾時未易歲也而叔姬亟來

亦非禮也

啖氏曰時叔姬初嫁未合歸寧

故書及書來以著齊罪也

大夫適他國必有君命與公事否則禮法之所禁而

可犯乎

啖氏曰大夫非公事與妻出境非禮也薛氏曰舍君事而從婦歸寧且非度高固之無忌

也憚惠公許其臣越禮恣行而莫遏高固委其君踰境

自如而不忌則人欲已肆矣凡婚姻常事不書高氏曰歸

寧常事不書反而書此者則以為非常為後世戒也

馬亦常事不書高氏曰子叔姬不冠夫氏者承上高固反之也家氏

曰反馬不躬至歸寧無並行高固列國之卿而挾婦

俱來前日以臣抗君猶以為未足更挾婦以要魯宣

館甥之禮宣固無所嫌魯之宗廟朝廷實重為之辱

矣。陸氏曰公羊曰言叔姬之來而不言高固之來

則不可其諸為其雙雙而俱至者按經文直書其事

楚

莊人伐鄭襄左傳楚子伐鄭陳及楚平晉荀林父救

鄭伐陳高氏曰去冬之伐稱楚子所以譏

以見非禮爾何

用曲為義乎

鄭也今稱人又罪其數犯中國也家氏曰經書楚伐而不書晉救者歸生弑君晉當出師討賊今既更歲因楚師之來而以兵救鄭是常討而不當救也晉人苟能為鄭討賊即所以存鄭楚師將不禦而自去何勞救乎張氏曰屢失機會大義不立營營救鄭以致楚人益陵諸侯攜貳茲晉之所以失道歟

戊定王六年

晉成四齊惠六衛成三十二蔡文九鄭襄二曹文十五陳靈十一杞桓三十四宋文

八秦桓二

春晉

成

趙盾衛

成

孫免侵陳

靈左傳晉衛侵陳陳即楚故也

按傳

去聲

稱陳及楚平荀林父伐陳經書不書者以下

書晉衛加兵于陳即陳及楚平可知矣以趙盾孫免

書侵即林父無詞可稱亦可知矣愛人不親反其仁

治人不治

去聲

反其智晉嘗命上將

去聲

帥師救陳又再

與之連兵伐鄭

並元年

今而即楚無乃於已有關蓋亦

自反可也不內省德遽以兵加之則非義矣故林父

不書伐而盾免書侵以正晉人所以主盟非其道也

高氏曰趙盾前會衛侯救陳今更與衛孫免加兵于其國故書侵以正主盟者之罪雖以陳背晉即楚亦以晉救之無功故也家氏曰陳之叛晉即楚以鄭故耳鄭穆暮年棄楚弗事而託身於中國亦望晉人有以大拯其危急曾未期年鄭有歸生之亂晉坐視莫之顧陳叛而與楚良以是耳晉成羸君政在趙氏豈能為鄭討賊然陳鄭每相視以為向背鄭賊之不討無以服陳人之心陳雖受伐而終不為晉屈也陳氏

曰趙盾之罪嘗著于春秋其再見曷為無貶自宋萬而下無討賊者則凡人而已矣。劉氏曰公羊自趙盾弑君何以復見弑君者趙穿也非也弑君復見者寧止盾乎穀梁云不言帥帥不正其敗前事亦非也

將尊師

少備

夏四月。秋八月螽

傳去聲謂螽為穀災

程子曰螽蝗也

虛取於民之効也

劉敞曰螽為穀

災貧虐取民則螽

先是公伐莒取向後再如齊伐萊軍旅數

色角反下同

起賦歛

去聲

既繁戾氣應

去聲下同

之矣

何氏曰公伐莒取向

公比如齊煩擾之所致

夫善惡之感萌於心而災祥之應見

音現

同於事宣公不知舍

上聲

惡遷善以補前行

去聲

之愆而

用兵不息災異數見年穀不豐國用空乏卒至於改

助法而稅民

十五年
初稅畝

盖自此始矣經於螽螟一物之

變必書于策示後世天人感應之理不可誣當慎其

所感也

高氏曰書八月者唯八月有之非歷時也螽
為農灾王道所重今以月書則為灾不久異

於以時書者矣愚按春秋書螽災者十有六而宣公
之世有四焉盖身為不義而貪暴於民是以致天災

之亟
數也

冬十月

春秋胡傳附錄纂疏卷十六

欽定四庫全書

經部

春秋胡傳附錄纂疏卷十七

詳校官監察御史_臣查善長

給事中_臣溫常綬覆勘

總校官進士_臣繆琪

校對官中書_臣李棻

謄錄監生_臣官懋弼

欽定四庫全書

春秋胡傳附錄纂疏卷十七

明 汪克寬 撰

宣公中

已定王七年晉成五齊惠七衛成三十三蔡文十鄭襄
三曹文十六陳靈十二杞桓三十五宋文

九秦桓三楚莊十二春衛侯成使孫良夫來盟左傳衛孫桓子來
盟始通且謀會晉

也穀梁傳來盟前定也不言及者以國與之
不言其人亦以國與之末日前定之盟不日

來盟爲前定者嘗有約言矣未足効信而釋疑又相

歃血固結之爾是盟衛欲爲去聲晉致魯而魯專事齊

初未與晉通也必有疑焉而衛侯任其無咎故遣良

夫來爲此盟而公卒見辱盟非春秋之所貴義自見

音矣愚按他國大夫來盟皆公與之盟但言來而與公敵禮可知外大夫之伉尊魯君之失列不待

貶而自著矣惟屈完來盟于師下書盟于召陵則見完之服義而不敢伉也宣公倚齊慕國晉爲盟主缺

然修好故與衛結盟而不能遁伯者之討蓋於已有歎而欲藉小信以免辱其足恃乎然魯衛兄弟之國

解紛救患迭相爲援衛成之執僖公爲之納賂於王與晉侯而得免黑壤之止疑亦衛成言於晉而以賂

得釋耳

夏公會齊侯

惠

伐萊

左傳不與謀也凡師出與謀曰及不與謀曰會杜氏曰萊國東萊黃

縣張氏曰今登州黃縣有萊山愚按今平陽路萊州

秋公至自伐萊大旱

及者內爲志會者外爲主

並穀梁

平莒及邾

四年

公所欲

也故書及繼以取向

舒亮反

即所欲者可知矣伐萊齊

志也故書會繼以伐致即師行之危亦可知矣

愚按春秋

以來桓致伐鄭莊致伐衛伐戎黨篡夷皆非常也僖致伐楚伐鄭國許則桓文之大征伐也他侵伐皆不致伐齊取穀以荆楚而治中國僅致焉耳今而伐萊萊微國也特書至者竭志從人而不思力之不足聲罪伐人而不察已之有玷兵出踰時煩民毒衆爲宣公危之也前此伐莒後此伐杞皆不致聖人蓋有

深意

公與齊侯俱不務德合黨連兵恃強凌弱

王氏曰萊

東夷小國初無召兵之釁公與齊侯伐之不過凌弱暴寡而已是以此舉也軍旅

之後必有凶年

前淮南王安傳安上書曰云云言以其愁苦之氣薄陰陽之和感天地之

精而災氣爲之生也老子儉武篇大軍之後必有凶年

言民以征役怨咨之氣

感動天變而旱乾

音

作矣其以大旱書者或不雩或不

雖雩而不雨也

杜氏曰書旱不書雩雩無功或不雩

不雩則無恤民憂

國之心雩而不雨格天之精意闕矣

愚按旱之爲言悍也上之人持

亢陽之節專壺於下則旱災應之宣公逼戎事齊煩於朝聘兵戎之事故先乎伐萊而僉爲災後乎伐萊

而旱爲虐猶不知警而重取
于民蓋不至於稅畝不已也

冬公會晉侯

成

宋公文

衛侯

成

鄭伯

襄

曹伯

文

于黑壤

左傳鄭及晉平公于宋之謀也故相鄭伯以會盟于黑壤王叔桓公臨之以謀不睦晉侯之立也公不朝焉又不使大夫聘晉人止公于會盟于黃父公不與盟以賂免故黑壤之盟不書諱之也杜氏曰黑壤晉地一名黃父愚按今在平陽路河中府

會而不得見不以不得見爲諱

成十六會沙隨晉聽叔孫僑如之譖不見

公盟而不與

音預下同

盟不以不與盟爲諱

昭十三同盟于平丘晉聽

邾莒之訴公不得與盟

則曲不在公而主會盟者之罪耳與於

會不與於盟而公有歉

若簞反不足也

焉非主會盟者之過

也則書會不書盟若黑壤是也

杜氏曰慢盟主以取執止之辱故諱之

晉侯之立公既不朝又不使大夫聘而每歲適齊是

宣公行有不慊

口劫反快也足也

於心而非晉人之咎矣凡

不直者臣爲

去聲下同

君隱子爲父隱於以養臣子愛敬

之心而不事盟主又以賂免則不直在已矣

愚按文公以不

朝晉而見討處父之盟書其事而不書公以諸侯之立當朝王而不當朝晉也其罪未可深責也宣公亦以朝晉而見討黑壤之盟書公而不書其事以連歲朝齊則亦當朝晉其罪實不可逭也是文公之辱其

責在晉而宣公之辱宜自責也雖然忽盟主而不事
缺於朝聘之禮特小過耳宣公篡立得罪於君父兄
大惡也晉人略大惡而問小過蓋當時霸者逞其私
欲惟利之求故罪其慢已以取賂而已矣使晉成之
討如晉厲之執曹成而歸諸京師則淺正之刑復何
逃耶春秋爲尊者諱冬會而春書至知其故而義自
見矣家氏曰晉自新城以來君侈而臣專政亂于內
威褻于外霸權盡削諸侯離散楚行師中原而不敢
問齊屈強東夏而無所忌成公新立合四國之君以
爲此會鄭舍楚而從晉再會于扈諸侯皆會庶幾中
國之猶有伯也杜氏曰晉靈公之會同皆不序自黑
壤而下復序諸侯何也垂隴之役初以大夫會盟自
以大夫會盟而後不序諸侯不序諸侯猶責伯者也
終靈公之篇則諸侯無貶矣以其不勝貶序之可也
自隱而下君恒稱君貶人之故諸侯多貶詞焉自文
而下大夫恒稱大夫貶人之故大夫多貶詞焉諸侯

不勝貶則政在大夫矣大夫
不勝貶則陪臣執國命矣

庚定王八年

晉成六齊惠八衛成三十四蔡文十一鄭
襄四曹文十七陳靈十三杞桓三十六宋

文十秦桓四
楚莊十三

春公至自會

臨川吳氏曰宣公墓立自疑
而不敢會晉衛欲為晉致魯

故去春使孫良夫來盟而後去冬公與黑壤之會縱使
無左氏所記止公不得與盟之辱亦必懷疑而可危故
此書至而自是不敢如晉矣愚按前此會平州不至納
賂於齊則無危殆之患此特書至以公見止於晉踰年
始返也盟會常事不致桓文之盟會皆不致也杜丘于
淮則桓公之衰新城則晉伯在大夫他未有害至者也
宣公致黑壤與斷道前則見討於晉
後則與晉謀討齊皆危殆之事也
○夏六月公子遂
如齊
惠
至黃乃復
公羊傳其言至黃乃復何有疾也何
言乎有疾乃復譏何譏爾大夫以君

命出聞喪徐行而不反穀梁傳乃者亡乎人之辭也杜氏曰黃齊地張氏曰齊竟上地

至黃乃復壅君命也

高氏曰不稱有疾者不可以疾廢君命也張氏曰罪其違君命

也與公孫教不至而復同

有疾亦不復可乎大夫以君命出聞喪

徐行而不返未致事而死以尸將事

何氏曰聞喪者聞父母之喪徐

行者不忍疾行又爲君當使人追代之以喪喻疾者喪尚不當反况於疾乎不言有疾者有疾猶不得反也儀禮聘禮篇若有私喪則哭于館衰而居不饗食歸使衆介先衰而從之若賓死未將命則既斂于棺

造于朝介將命

楚伐吳陳侯使公孫貞子往弔及良而卒將

以尸入吳人辭焉上介弔

于付反

尹蓋曰寡君使蓋備

使

去聲

弔君之下吏無祿使人逢天之感大命隕墜

絕世于良廢日供積

音積

一日遷次今君命逆使人曰

無以尸造

去聲

于門是我寡君之命委于草莽也無乃

不可乎吳人不敢辭

見左傳哀十五年

君子以爲知禮

杜氏曰傳

言芋氏蓋知禮

乃者無其上之詞

愚按

乃者繼事之辭而有專意士句之乃還專而合

於義者也仲遂之乃復專而不合於義者也

其曰復事未畢也

陸氏曰穀梁公還

者事未畢復者事畢文正倒也當爲還者事畢復者事未畢師還公還自晉歸父還自晉士句聞齊侯卒乃還皆不復更往故曰還事畢也公如晉至河乃復公孫敖如京師不至而復仲遂至黃乃復皆事未畢

而復也愚按教言不至則實未嘗如京師遂言至黃而下書卒則知有疾而返是教之罪視遂尤重也

卒已有事于大廟仲遂卒于垂

大音泰公羊傳仲遂者何公子遂也不稱公子

爲弑子赤貶曷爲不於其弑焉貶於文則無罪於子則無年穀梁傳爲若反命而後卒也是不卒者也其卒者何也以譏乎宣也聞大夫之喪則去樂卒事杜氏曰有事祭也仲遂卒與祭同日略書有事爲繹張本垂齊邑非魯境故書地陳氏曰大夫卒竟內不地竟外地

有事言時祭

王氏曰當是禴祭不書禴者失不在祭也臨川吳氏曰有事者時享之常禮也

先儒謂此爲時禘秦溪楊氏云四時禴祠烝嘗祭羣廟禮煩乃於大祖之廟合高曾祖禰之主共祭之今按禮有一牖一裕之說或分享於五廟或合享於太廟合享則書有事於太廟分享則書四時祭名時享

常事不書欲知仲遂以祭之日而卒故書

此公子遂也曷為書字生而賜

氏俾世其官也曷為書卒以事之變卒之也

通旨問仲遂卒

何以不書公子曰仲遂本不當書卒以事之變而卒之故不復書公子其曰仲遂以見生而賜之氏也

古者諸侯立家

桓二師服云云

大夫卒而賜氏

隱八衆仲云云

其後

尊禮權臣寵遇貴戚而不由其道於是乎有生而賜

氏其在魯則季友仲遂是也襄仲殺惡及視援立宣

公而宣公深德之故生而賜氏使世大夫以答之也

經於其卒書族以志變法之端為後世戒

劉氏曰春秋識世卿

自是世仲氏也陳氏曰大夫卒恒稱名其兼字之何
自是仲氏世爲卿故譏之也張氏曰仲遂得罪於文
公以翬不書卒例之不當書卒因事之變卒之也書
仲遂其字也蓋宣公德之與季友之於僖公同有輔
立之恩故亦生而賜氏俾世其卿也臨川吳氏曰仲
者遂之字卒而以字加于名之上者賜之族而以其
字爲氏豫命其子孫世世爲卿如季友之例也○劉
氏曰穀梁云其曰仲疏之也非也即春秋欲疏之何
不書遂卒若無駭與俠乎且欲疏弑
君之臣不書其氏反書其字何也

壬午猶繹萬入去籥

去起呂反傳及註同左傳襄仲卒而繹非禮也公羊傳繹者何祭之

明日也萬者何千舞也籥者何籥舞也其言萬入去籥何弄其有聲者廢其無聲者存其心焉耳知其不可而爲之也猶者何通可以已也穀梁傳壬午猶繹猶者可
以已之辭也繹者祭之旦日之享賓也萬入去籥以其

為之變
議之也

繹者祭之明日以賓尸也

孫炎曰尋繹復祭也爾雅

氏曰禮繼昨日事但不灌地降神天子諸侯曰繹大夫曰賓尸士曰宴尸天子以卿為尸諸侯以大夫為

尸卿大夫以下以孫為尸尸屬昨日配先祖食不忍輒忘故因以復祭殷曰彤周曰繹朱子曰賓尸以賓

客之禮燕為尸者

猶者可已之詞

杜氏曰猶者可止之辭朱子語猶繹是不必繹而猶

繹也萬舞也

據杜氏注孔氏正義王者以萬人服天下故以萬為名

以其無聲也

故入而遂用籥管也

何氏曰籥所吹以節舞也吹籥而舞文樂之長詩左手執籥注

文舞也籥如苗而六孔

以其有聲也故去而不作

呂氏曰萬舞文武二舞之

總名籥舞文舞之別名文舞又謂之羽舞蓋文舞吹
籥秉翟羽也萬入去籥者文武二舞俱入於二舞中
去羽舞是謂故知不可存其邪心而不能格也何氏
吹籥者其心猶存於樂知其不可故去其有聲者而爲之張
氏曰喜怒哀樂發而中節謂之和仲遂殺嫡宣公以
其私於已而愛之生賜之氏今出使擅返不正其罪
其喜樂既不以正聞喪當哀又復心知其不可故行
古禮春秋謹書始末以見其心不正而施之宗廟禮
朝廷者謬戾如此詳觀書法見聖人格心之道矣禮
大夫卒當祭則不告檀弓衛太史柳莊寢疾公曰若疾革雖當祭必告愚按君在祭
不當告故衛獻公越常禮以厚其臣然疏謂祭事雖了與尸爲禮未畢耳終事而聞則不
繹檀弓仲遂卒猶繹仲尼曰非禮也卿卒不繹杜氏曰魯人知卿佐之喪不宜作樂而不知廢繹故納

舞去籥林氏曰按曾子問諸侯祭社稷俎豆既陳聞天子崩后之喪廢則卿喪不廢正祭繹是又祭爲輕故當廢之不告者盡肅敬之誠於宗廟不繹者全始終之

恩於臣子今仲遂國卿也卒而猶繹則失寵遇大臣之禮矣春秋雖隆君抑臣而體貌有加焉則廉陞益

尊而臣節礪

說文礪本作厲前賈誼傳人主之尊譬如堂羣臣如陛衆庶如地故陞九級上

廉遠地則堂高陞亡級廉近地則堂卑君之寵臣雖有過刑戮之罪不如其身所以體貌大臣而礪其節也注廉後世法家
前藝文志有法家者流蓋申商韓非刑名之學
專欲隆君

而不得其道至以犬馬國人相視本孟大倫滅矣聖

人書法如此存君臣之義也

通旨若專於尊君則視臣如犬馬臣亦視君如

寇讎上下俱無恩禮則賢者退處所存者阿諛小人將有以天下奉一人之說矣春秋書仲遂猶繹謂君與卿佐爲一體股肱或虧豈不隱痛仁宗以富弼母喪在殯罷春宴韓魏公薨神宗發哀過舉數皆得春秋之法或問去樂卒事是否曰凡享祀宗廟當盡禮卿卒於外而去樂卒事是私家強公室弱也君臣上下纔過毫釐即失正以此看春秋於人倫上有無窮妙意石氏曰禮有重輕先後之不同以祭視繹則祭爲重而繹爲輕以繹視卿佐之喪則繹爲輕而卿佐之喪爲重有國者當圖其稱也孫氏曰仲遂雖卒猶當追正其罪宣公不能正遂之罪則當爲之廢繹何者君臣之恩未絕也高郵孫氏曰仲遂弑君之賊苟以弑逆討之則罪無所逃矣宣公恃之得位既任之爲大夫則當盡遇臣之禮卒而猶繹萬入去籥所謂

知其不可而
爲之者也

戊子夫人嬴氏薨

公穀作
熊氏

敬嬴文公妾也

杜氏曰
宣公母

何以稱夫人自成風聞季友

之繇

直救反

事友而屬

章欲反下同

其子

左傳
閔二

及僖公得國

立以爲夫人於是乎嫡妾亂矣春秋於風氏凡始卒

四貶之則禘于太廟

傳

秦人歸襚

音遂文九

榮叔含

戶暗反

贈召

音邵

伯會葬

文去上聲

其姓氏不稱夫人王再書而

無天是也敬嬴又嬖私事襄仲而屬宣公不待致于

太廟援例以立則從同同而無貶矣

高氏曰此文公之妾也何以稱

夫人薨援成風之例僭也

其意若曰以義起禮爲可繼苟出於私

情而非義後雖欲正可若何

啖氏曰成風之後妾母皆僭用夫人禮故亦書

薨以著其非家氏曰哀姜淫亂與慶父同弑二君齊桓討而殺之僖於是尊其母成風爲夫人以配其父此僭也然非哀姜不終則僖亦未敢遽如此今敬嬴之事則異於是嬴以嬖妾私事襄仲弑子赤立宣公逐嫡母歸齊而已僭夫人之位出姜無罪爲賊臣悖妾所逐不得與哀姜同例嬴與其子弑君逐母僭號夫人亦不得與成風偶使遇齊桓則敬嬴襄仲皆當比而誅戮王室不競中國無伯得以肆行無忌孰知天道禍盈至是八年仲使齊死于路後八日嬴隕于魯與哀姜慶父先後即誅其事相類但有天討人刑

之異耳愚按春秋既書夫人姜氏薨于夷又書夫人
風氏薨則知哀姜爲莊公夫人而成風乃妾也既書
夫人姜氏歸于齊又書夫人嬴氏薨則知出姜爲文
公夫人而敬嬴乃妾也直書于策讀者比事以考之
雖微傳而嫡妾之分明矣○趙氏曰公穀並云熊氏
又謚爲頃據理頃爲惡謚不應公母加惡謚當從左
氏爲敬嬴

晉成師白狄伐秦

桓白狄始見經左傳白狄及晉平夏會晉伐秦杜氏曰白狄狄別種故西

河郡有白狄國張氏曰今丹州延州銀夏之地愚按今屬延安路

晉主夏盟糾合諸侯禦外侮安諸夏乃其職矣秦人
之怨起自侵崇其曲在晉責已可也既不知自反釋

怨修睦以補前過已可咎矣乃復

扶又反

興師動衆會

戎狄以伐之獨不惡

去聲

傷其類乎直書于策貶自見

音現矣

高氏曰殺之役書及姜戎此不言及者以傳考之白狄為主也經先晉者所以存伯國之體也

以伯國而甘為人所帥晉之恥也家氏曰不書及偶晉於狄亦外晉耳張氏曰白狄秦同壤之國晉與秦自侵崇啓釁七年猶未已與白狄為昏結以伐秦自此至成十三年呂相絕秦之詞皆連兵之事

楚

人滅舒蓼

公作舒鄆左傳楚為衆舒叛故伐舒蓼滅之楚子疆之及滑汭盟吳楚而還杜

氏曰舒蓼二國名張氏曰地譜上義陽之蓼文五年已滅於楚此即如舒鳩舒庸蓋羣舒別種非二國也愚按

今安豐路霍丘縣舊名蓼縣

按詩

閔宮

稱戎狄是膺荆舒是懲在周公所懲者其自

相攻滅中國何與

音預

焉然春秋書而不削者是時楚

人疆舒蓼及滑汭盟吳越勢益强大將為中國憂而

民有被

皮寄反

髮左衽

而審反

之患矣經斯世者當以為

懼有攘却之謀而不可忽則聖人之意也

愚按春秋未有二國

連書者雖外域之國尚書甲氏及留吁舒蓼不言及實一國耳

秋七月甲子日有食之既

通旨先是中華大國齊晉皆亂楚莊始強肆行侵伐觀兵

周室鄭伯肉袒北敗晉師流血色水圍宋九月析骸易子此食既之應而五行志以為楚鄭分也

○冬

十月己丑葬我小君敬嬴

敬嬴公穀作頃熊

成風薨以夫人葬以小君將祔

附音

于廟而始有二夫

人也則四貶之以正其事今敬嬴亦薨以夫人葬以

小君使祔于廟無貶以正之從同同可也

范氏曰宣公立妾母

為夫人君以夫人禮卒葬也故主書者不得以為夫人義與成風同

而於宣公元年

即以所逆穆姜婦之何也曰婦有姑之詞見

音現敬嬴

遂以子貴援例而亟立為夫人也僖公享國八年然

後致成風而敬嬴之亟也雖云援例魯君臣之責亦

可知矣無貶而書法若此者猶桓宣弑君而書即位

爾

臨川吳氏曰僖宣襄昭四姜母羣臣皆逢君之意而尊爲夫人也○趙氏曰二傳作頃熊頃惡謚也

宣公必不以惡謚加其母誤也

雨不克葬庚寅日中而克葬

公羊傳頃熊者何宣公之母也而者何難也乃者何

難也曷爲或言而或言乃乃難乎而也穀梁傳葬既有日不爲雨止禮也雨不克葬喪不以制也而緩辭也足乎日之辭也

敬嬴以其子宣公屬

章欲反

諸襄仲殺太子及其母弟

雖假手於仲實敬嬴之謀也經書子赤卒夫人姜氏

歸于齊

文十

其文無貶而讀者有傷切之意焉則以

秉彝不可滅也傳

去聲

謂哭而過

平聲

市市人皆哭敬嬴

逆天理拂人心之狀慘矣其於終事雨不克葬著咎

徵

知陵反

焉

襄陵許氏曰子惡之弑謀自敬嬴故春秋因其雨不克葬著咎徵焉君子於是乎知

有天道王氏曰春秋內葬十有九唯敬嬴定公二喪遇雨定公得國於逐君之賊敬嬴殺嫡立庶故於終事皆遭陰譴而謂無天道乎此皆直書以見

音現下同

人心與

天理之不可誣者也夫喪事即遠有進無退浴于

中雷

力救反見坊記

飯

扶晚反

于牖下小斂

力驗反

于戶內大斂

于阼階殯于客位遷于廟祖于庭

祖始行也

塋浦鄧反

于

墓

見檀弓

以弔賓則其退有節

坊記賓禮每進以讓喪禮每加以遠檀弓君於

大夫將葬弔於宮及出命引之三步則止如是者三居退朝亦如之哀次亦如之

以虞事則

其祭有時

檀弓葬日中而虞

不爲

雨止禮也

王制庶人縣封葬不爲雨

止

雨不克葬喪不以制也

范氏曰禮先遷柩於廟其明昧爽而引既及葬日之

晨則祖行遣奠之禮設矣故雖雨猶終事不敢停柩久次

或曰卜葬先遠日所以

避不懷也

左傳孔氏正義凡卜筮日旬之外曰遠某日喪事則先卜下旬避不思念其親

侯相朝與旅見天子入門而雨霑服失容則廢

見曾子問

矧送終大事人情所不忍遽者反可冒雨不待成禮

而葬乎

見劉氏權衡

潦車載簣笠

見儀禮既夕禮篇潦車作藁車

士喪禮

也有國家者乃不能爲雨備何也

范氏曰士喪禮有潦車載簣笠則人

君之張設固宜兼備陸氏曰國君不當無雨備

且公庭之於墓次其禮意固

不同矣不得不可以爲悅無財不可以爲悅得之爲

有財古之人皆用焉

本孟子朱子注不得謂法制所不當得得之爲有財言得之而

又爲有財也

而不能爲之備是儉其親也不亦薄乎故穀

梁子曰雨不克葬喪不以制也厚葬古人之所戒而

墨之治喪也以薄

見孟

又君子之所不與故喪事以

制春秋之旨也

孫氏曰雨不克葬讖無備也葬既有日不爲雨止已丑之日喪既行而遇

雨也且雨之遲久不可得而知或浹旬彌月其可停柩路次不行乎高郵孫氏曰孔子葬母雨壞其墓門人修之孔子不樂老聃助葬日食而止既明而後行蓋雨則常有可以前備而日食非常不可預知也春秋書雨不克葬蓋讖之也愚按禮記孔氏正義云在廟未發之時庶人及卿大夫亦得爲雨止若其已發在路及葬則不爲雨止其人君在廟及在路及葬皆爲雨止今考此年上書葬我小君敬嬴而下書雨不克葬則及葬而雨也苟在廟未發則當云庚寅葬而不云已丑葬矣季文子適晉而求遭喪之禮以行宣公曷乃不豫備遇雨之具乎然潦車載蓑笠縣封葬不爲雨止皆士庶人之制而非國君之制穀梁讖不

克葬而左氏以爲得禮近世名儒亦有講於此者有謂雨而無害於力役者雖葬可也其或天變駭異雨甚水至不可以即土汲汲焉葬反爲不可追之悔則左氏之說亦未爲失然權二者之宜在乎孝子慈孫之誠敬何如耳春秋之書將以垂法於後國君之葬宜無所不備以雨故不克葬明日乃克葬謂之無貶也

城平陽

左傳書時也杜氏曰泰山平陽縣張氏曰今蘄

滕州高氏曰懼晉故也方舉大喪又城平陽重困民力也○家氏曰左氏言水昏正而我周正十月乃今之八

月水星不應昏正此謂書時非也

○楚

莊

師伐陳

靈左傳陳及晉平楚師伐陳取成而還高

氏曰陳以晉衛見侵復棄楚而從晉故楚以爲討然晉不能救陳人遂復即楚愚按書師書伐所以著夷狄之

強而傷中國霸者之不振也

卒定王九年晉成七年卒齊惠九衛成三十五卒蔡文十酉七年

七宋文十一秦桓五楚莊十四春王正月公如齊惠范氏曰有母之喪而行朝會非禮孫氏

曰公有母喪而遠朝疆齊無哀甚矣公至自齊○夏仲孫蔑如京師定左傳王

使來徵聘夏孟獻子聘于周王以爲有禮厚賄之

以淺言之屬章欲反辭比毗志反事春秋教也本經解孔氏正義屬

合也比近也春秋聚合會同之辭是屬辭比次褒貶之事是比事也當歲首月公朝于

齊夏使大夫聘于京師此皆比事可攷不待貶絕而

惡自見

音現

者也

高氏曰傳言王使徵聘信斯言也益見王室之微矣

宣公享國

九年於周纔一往聘其在齊則又再朝矣經於如齊

每行必致深罪之也

四年至此三如齊皆書至蜀杜氏曰未踰時而書至危之也

下逮戰國周衰甚矣齊威王往朝于周而天下皆賢

之

史烈王六年齊威王來朝是時周室微弱諸侯莫朝而齊獨朝之天下以此益賢威王

况春

秋時乎而宣公不能也故聘覲之禮廢則君臣之位

失諸侯之行

去聲

惡而倍

與背同

畔

與叛同

侵陵之敗起矣

經解朝覲之禮所以明君臣之義也聘問之禮所以聽諸侯相尊法也云云

此經書君如

齊臣如周之意而特書王正月以表之也

愚按前此五年如齊

止書春後此十年如齊亦止書春惟此年如齊書王正月蓋所以著君朝于鄰國臣聘于京師其所厚者薄而其所薄者厚不知大一統之義亦猶襄二十九年書公在楚係之春王正月而上書天王崩楚子卒下書五月公至自楚所以著其不奔天王之喪而朝于強夷俾侯送葬而後歸其於大一統之義何如也或謂僖公十年十五年如齊襄公八年二十一年如晉皆書春王正月豈有他義乎吁是不然僖襄如齊也其與公如齊仲孫蔑如京師天王崩而公在楚者異矣

齊侯

惠

伐萊

襄陵許氏曰赤狄比侵齊不敢報萊不伐齊而齊亟伐之可以觀惠公畏彊凌弱矣

○秋取根牟

杜氏曰根牟東夷國也琅邪陽都縣東根牟鄉張氏曰今屬密州安丘縣陳氏曰此

年取根牟成六年取鄆襄十三年取邾皆微國也愚按今益都路寧海州牟平縣根牟蓋小國內諱滅故書取

與鄆邾同昭八年蒐于紅自根牟至于商衛即所取根牟地○劉氏曰根牟附庸國也左氏曰言易也非也根

牟雖小不以兵革不能取也不分別國邑取滅之名而苟記其難易豈春秋意哉公羊曰邾婁之邑不繫邾婁

諱亟也妄甚矣

○八月滕子卒

昭公也子文公壽嗣高氏曰自隱七年書滕侯卒至此始書滕

子

○九月晉侯成宋公

文

衛侯

成

鄭伯

襄

曹伯

文

會于

扈晉荀林父帥師伐陳

靈

按左氏討不睦也

杜氏曰謀齊陳

陳侯不會荀林父以諸侯

之師伐陳晉侯卒乃還旋則知經所書者與晉罪陳

之詞也會于扈以待陳而陳侯不會然後林父以諸

侯之師伐之也則幾於自反而有禮矣不書諸侯之

師而曰林父帥師者在會諸侯皆以師聽命而林父

兼將去聲之也則其衆輯矣晉主夏盟又嘗救陳所宜

與也而惟楚之即夫豈義乎愚按黑壤之會計魯而宣公以賂免扈之會謀

齊陳而二國不會蓋晉成爲弑君者所立不能致討

侵陳之役奄然以元惡主兵是以外不足以却荆楚

內不足以服諸侯今此謀齊而篡立之魯宣獨事齊

而不會無所忌憚故成公世霸僅能兩會諸侯卒無

成功春秋於荀林父之討陳書帥師書
伐雖曰與晉而不能茫陳其失亦著矣

辛酉晉侯黑臀卒于扈

成公也在位七年子獯嗣是為景公穀梁傳其地於外也杜氏

曰扈鄭地卒於境外故書地襄七年傳諸侯卒于境內不地愚按諸侯卒於師曰師曹伯盧及負芻是也卒于會曰會杞伯成是也于他國則如許男甯蔡侯東國卒于楚吳子遏卒于巢是也于封內則如鄭伯髡頑卒于鄆宋公佐卒于曲棘是也晉成公不言卒于會蓋會禮已畢故不言會爾。劉氏曰穀梁云其日未逾竟也非也未踰竟猶在國爾何得書其地然則扈者他國之地名非晉地也

○冬十月癸酉衛侯

鄭卒

成公也在位三十五年子速嗣是為穆公

晉成公何以不葬魯不會也衛成公何以不葬亦魯

不會也衛成事晉甚謹而魯宣公獨深向齊衛欲爲

去聲晉致魯故謀黑壤之會而特使孫良夫來盟以定

之也及會于黑壤而晉人止公賂然後免是以扈之

會皆前日諸侯而魯獨不往二國繼以喪赴亦皆不

會此所謂無其事而闕其文者也或曰二君皆有貶

焉故不書葬

何氏曰晉成公不書葬篡也衛成公不書葬殺公子瑕也

誤矣魯人

不會亦無貶乎書卒而以私怨廢禮忘親其罪已見

音現

春秋文簡而直視人若日月之無私照也曲生意

義失之遠矣

臨川吳氏曰春秋刑書也事實辭文善惡畢見聖人何容心哉蓋渾渾如天道焉

宋丈人圍滕

左傳因其喪也

圍國非將

去聲

卑師少所能辦也必動大衆而使大夫

為主帥

去聲

明矣然而稱人是貶之也滕既小國又方

有喪所宜矜哀弔恤之不暇而用兵革以圍之比

毗志

反事以觀知見貶之罪在不仁矣

蜀杜氏曰諸侯擅兵圍人之國況又

因其喪故從書人之貶家氏曰滕子卒曾未數月宋乘其喪而圍之匪惟乘滕之喪亦乘晉之喪晉政不競諸侯擅相侵伐貶宋亦以譏晉也

楚

莊

子伐鄭

襄

晉卻缺帥師救鄭

自是晉楚交伐鄭左傳楚子爲厲之役故

伐鄭晉卻缺救鄭鄭伯敗楚師于柳棼國人皆喜唯子良憂曰是國之災也吾死無日矣

楚兵加鄭數

危角反

矣或稱人或稱爵何也鄭自晉成

公初立舍

上聲

楚而從中國正也

宣三年傳言晉侯伐鄭鄭及晉平士會入

盟

楚人爲

去聲

是興師而加鄭不義矣故宣公三年書

人書侵罪之也次年鄭公子歸生弑其君諸侯未有

聲罪致討者而楚師至焉故特書爵與之也然興師

動衆賊則不討惟服鄭之爲事則非義舉矣故又次

年傳稱楚子伐鄭而經書人再貶之也至是稱爵豈

與之乎按公羊例君將

去聲

不言帥師書其重者也至

此書爵見

音現

其凌暴中華以重兵臨鄭矣何以知其

非與之乎曰下書晉卻缺帥師救鄭則知其非與之

也

凡書救未有不善之也救者善則伐者之罪著矣

由此觀春秋書法皆欲

治亂賊之黨謹中外之辨以一字爲褒貶深切著明

矣

愚按五年晉荀林父救鄭經不書者以是時鄭方有弑君之亂所當討而不當救故不書救今此書

卻缺之救據明年傳載鄭討歸生之罪斷其棺而逐其族蓋此時歸生已斃矣故書救以與晉也

陳靈殺其大夫洩治

洩息列反公穀作泄治音也左傳陳靈公與孔寧儀行父通於夏姬

皆衷其袒服以戲于朝洩治諫曰公卿宣淫民無效焉且聞不令君其納之公曰吾能改矣公告二子二子請殺之公弗禁遂殺洩治孔子曰民之多辟無自立辟其洩治之謂乎穀梁傳稱國以殺其大夫殺無罪也洩治之無罪如何陳靈公通于夏徵舒之家公孫寧儀行父亦通于其家或衣其衣或衷其襦以相戲於朝洩治聞之入諫曰使國人聞之則猶可使仁人聞之則不可君愧於泄治不能用其言而殺之

稱國以殺者君與用事大臣同殺之也

莊二十六年傳稱國以殺

者國君大夫與謀其事與謀其事者用事之大夫也見殺者不得於君之大夫也

稱其大夫

則不失官守而殺之者有專輒之罪矣洩治無罪而

書名何也治以諫殺身者也殺諫臣者必有亡國弑

君之禍故書其名爲徵舒弑君楚子滅陳之端以垂

後戒此所謂義係於名而書其名者也比干諫而死

子曰商有三仁焉

史宋世家王子比干紂親戚也見其子諫不聽曰君有過而不以死

爭則百姓何辜乃直言諫紂紂怒殺比干

洩治諫而死何獨無褒詞夫語

默死生當

去聲

其可而止爾洩治之盡

子忍反

言無隱不

愧乎史魚之直矣

論語子曰直哉史魚邦有道如矢家語史魚驟諫靈公進蘧伯玉退

彌子瑕公不從既死猶以尸諫

方諸比干自靖自獻于先王

見微子之命

則未可同日而語也

通旨比干在紂之時親則王子位則三公故諫而不從繼之以

死洩治於靈公親非貴戚之卿而位不爲上大夫也直諫而死傷於勇矣故書名以示貶春秋書殺大夫不特罪諸侯之專殺見殺者與有貶焉君子危邦不入亂邦不居如宋子哀微見宋亂而去聖人取其見幾所以書字自非有撥亂之全才安可蹈危亂之朝輕生易死而不自愛乎家語子曰比干於紂親則諸父官則少師固必以死爭之洩治之於靈公位在大夫無骨肉之親懷寵不去仕於亂朝以區區之一身欲正一國之淫昏可謂捐矣

治雖效忠其猶在宋子哀魯叔肝之

後乎故仕於昏亂之朝若異姓者如子哀潔身而去

可也

文十四子哀來奔杜氏曰貴其不食汙君之祿

其貴戚即不食其祿如

叔盱善矣

十七年叔盱卒穀梁曰宣弑而非之終身不食宣公之食杜氏曰國無道危行言孫

治直諫於淫亂之朝以取死故不爲春秋所貴陸氏曰洩治之死春秋責其非輔弼之臣居於淫亂之邦不能去位而行強諫乃是取死之道故君子不貴也稱國以殺者以直諫縱邪臣害之累上之意可知也劉氏曰洩治信能諫其君然而非大臣之操也所謂大臣者必潔其身於進退之始不可入焉則止矣今陳侯君臣之淫非一歲之積洩治猶安其朝至不勝其欲而大亂廢男女之節然後言之則其從君於昏多矣夫謂之從則具臣也居大臣之位而爲具臣之操過而見殺未爲不幸也且陳侯之淫舉國皆惡之不獨洩治知之然則非能知君淫之爲賢以能止君淫之賢也非能言國亂之爲智以能去國亂之爲智也張氏曰君子見幾而作不俟終日方靈公君臣驕馳株林之時治知其不可諫潔身而去可矣至於褻

慢朝廷衷服而戲則立於其朝者雖欲默而不可得矣失於不能知幾而早辨也木訥趙氏曰薦圭璧於泥塗固已疎矣觸虎狼以取死庸得爲智乎愚按洩治之失在於不能早諫以畜止其君之惡然其捐生盡言未可深責苟皆爲避禍之計則忠言不入於耳淫虐之君無所不至其禍尤不可勝言矣文定於徵舒弑君之傳曰忠莫顯於身見殺而其言驗其所以許治者何如哉

壬定王

十年

晉景公孺元年齊惠十卒衛穆公速元年

戌八年

十年

蔡文十三鄭襄六曹文十九陳靈十五弑

杞桓三十八宋文十

春公如齊

惠○公至是四朝齊

公至自齊

二秦桓六楚莊十五

此亦如齊亦致其至而不書月上九年亦如齊亦致其至而書月者爲去聲是年夏使仲孫蔑如京師故特

於歲首書王正月以著宣公之罪而君臣名分

去聲下同

之際謹嚴如此也歸田以爲私惠比於君臣名分之

際則大小不侔矣

齊惠人歸我濟西田

左傳齊侯以我服故歸濟西之田程子傳齊魯修好故歸魯田田魯

有也齊非義取之故云歸我不足爲善也

宣公於齊順其所欲既以女妻

去聲

其臣

五年高固逆叔姬

又

以兵會伐萊之舉又每歲往朝于齊廷雖諸侯事天

子無是禮也

諸侯事天子比年一小聘三年一大聘五年一朝今宣公自四年至十年七年

之間五如齊元年及十年皆一年三遣大夫如齊過於事天子之禮矣

故惠公悅其能

順事已而以所取濟西田歸之也歸謹及闡直書曰

歸

趙氏曰歸者來致之辭

此獨書我者乃相親愛惠遺

去聲之意

深著齊人助成弑逆之罪也

通旨問傳曰其言我者深著齊人助成弑逆之

罪也夫定亂臣之位而取其賂以其服而復歸之固皆罪矣然其歸也不猶愈於取之乎曷爲於取不書我而書於歸也曰天理至公無彼此人欲私熾則有我矣逆已而怒順之則喜慢已則怒下之則喜魯宣之於齊惠蓋能順其所爲而致恭以下之也故惠公深喜之而以濟西田歸魯其稱我者乃相親愛惠遺之意魯人復得所賂則心益放惡益遂矣故以爲深著助成弑逆之罪其取之也以貪人之貨已其歸之

也以悅人之事已而皆不以道也豈以歸賢於取乎
求嘉呂氏曰取不言我者宣公以立之不正而欲賂
齊以求會故不言我以見內無惜之意也於其歸
也則公比年如齊情好以篤外有朝聘之禮內有婚
姻之故魯亦欲得而齊以歸之是
以言我以見內有欲之之意也或謂濟西魯之本

封故書我

趙氏纂例

則誤矣以柔巽卑屈事人不以其道

而得地與悅人之柔巽卑屈事已不以其道而歸其

地皆人欲之私而非義矣

高氏曰元年書齊人取濟西田蓋魯以濟西之田賂

齊而齊人取之也至是而歸者公比年朝齊齊侯感公朝事之勤因以歸之也夫魯之分地先君受之於天子豈可失墜又况負弑逆之罪賂以免討乎齊人取弑逆之賂以縱惡故其取其歸皆謹書之家氏曰

天道十年而一周人事十年則一變桓之篡隱歷十年而無討春秋於是歲始書王以正之今宣之篡亦至此十年天王無討方伯不問齊人忽以賂田來歸蓋以十年之久天理必復齊人知罪之所在而自舉本田以復於魯也愚按齊人歸地者三鄆謹龜陰之田孔子以禮化強暴齊景心服而歸之書曰來歸來歸者美辭也謹及闡以哀公悔過遷善歸邾子益于邾故齊悼歸其二邑故書曰歸歸者順辭也惟此濟西之田宣公踰禮以悅齊齊惠喜於媚已而歸其田於魯一出於相與之私故書歸我我者私已之謂也不惟異於聖人之行王道其比哀公之改過亦不可同日語矣○趙氏曰公羊云齊已取之矣言我者未絕於我也其實未之齊也按已取之又言未絕何迂誕之甚穀梁云公娶齊齊由以爲兄弟反之不言來公如齊受之也哀八年歸謹及闡豈是公受乎但言歸我則知其來也省文耳

夏四月丙辰日有食之

何氏曰與八年食既應同事重故累食

○己巳齊

侯元卒

惠公也在位十年子無野嗣是為頃公

○齊崔氏出奔衛

公羊傳崔氏齊

大夫也其稱氏何譏世卿世卿非禮也穀梁傳氏者舉族而出之之辭也

按左氏崔杼有寵於惠公高國畏其逼也公卒而逐

之奔衛書曰崔氏以族奔也

范氏曰崔杼以世卿專權齊人惡其族今出奔

既不欲其身反又不欲立其宗後故逐其族若舉族盡去之爾

許翰以謂崔杼出而

能反反而能弑者以其宗強於此舉氏辨之早也其

說得矣

張氏曰特書其氏見崔杼之宗強於齊故勢足以逼高國今日雖逐之而尚能復歸於齊

如崔成之徒後日卒自遺滅宗之禍豈非族大勢張而不知制節謹度卒至凶于家禍于國也歟家氏曰是歲至杼弒君蓋五十六年使杼得年七十此時方在弱冠不應權勢已盛爲人所畏疑非杼之身或其父但不

所謂譏世卿者非公羊本旨蓋門弟子因尹

氏武氏稱世卿而附益之於此爾經有事同而詞異

亦有事異而詞同一視之則泥

去聲

而不通矣

孫氏曰東遷之

後天子諸侯大夫皆世書尹氏譏天子大夫書崔氏譏諸侯大夫高郵孫氏曰自隱至昭二百年而尹氏世執周政故卒有子朝之難而專廢立之權自宣至襄五十餘年崔氏世爲齊大夫故卒有弒君之禍也春秋之時尊莫如周強莫如齊而世卿之禍如此尹氏崔氏聖人擇其至強而爲害之深者以爲戒也愚

按崔杼之奔蓋如陳文子之出不久而復返也文定從穀梁謂舉族而出之然杼之宗族強盛所以出而能反反而能弑者由其世爲大夫故致是耳僖二十八年傳紀崔天會戰城濮則世襲大夫可知矣且崔氏乃丁公之子孫迨今五百年苟非世大夫曷能長有後於齊國乎○劉氏曰左氏云書曰崔氏非其罪也且告以族不以名非也齊雖告以族春秋固當正之若曰崔杼無罪則樂盈亦無罪何以不曰樂氏出耶奔

公如齊

頃左傳公如齊奔喪杜氏曰公親奔喪非禮也公出朝會奔喪會葬皆書如不言其事史之常

也

五月公至自齊

公如齊止此

文約而事詳者經也春如齊朝惠公夏如齊奔其喪

若是雖不致可也而皆致者甚之也

王氏曰禮諸侯卒有服者奔喪

無服者會葬公之於齊非有服也而親奔其喪諂諛甚矣以諂事齊不問禮之當否有取危之道故春夏兩如皆致之

天王之喪不奔欲行郊禮而汲汲於奔齊惠

公之喪天王之葬不會使微者往而公孫歸父會齊

惠公之葬其不顧君臣上下尊卑之等所謂肆人欲

滅天理而無忌憚者也詞繁而不殺

所賣反

聖人之情

見

音現

薛氏曰行不以禮而源源不已何公之不憚煩也家氏曰天王之喪魯不奔不賻今也懷

輔篡之私恩如齊奔喪事之悖也春而書公如齊公至自齊曾未數月又書公如齊公至自齊備書所以

貶也愚按魯君親往奔喪送葬者三春秋於此年書齊侯元卒公如齊公至自齊於成十年書晉侯孺卒公如晉明年三月公至自晉襄二十八年書公如楚楚子昭卒明年正月公在楚五月公至自楚雖不言奔喪送葬而其實瞭然矣春秋歷十有二王惟叔孫得臣叔鞅送襄景之葬公孫敖奔襄王喪而不至晉之不知所尊至於此極他何望焉馴至昭公之弔少姜至河乃復以國君之重奔嬖妾之喪却而不納益可傷矣

癸巳陳夏徵舒弑其君

靈平國

徵知陵反左傳陳靈公與孔寧儀行父飲酒於

夏氏公謂行父曰徵舒似女對曰亦似君徵舒病之公出自其廐射而殺之二子奔楚

陳靈公之無道也而稱大夫之名氏以弑何也禍莫

大於拒諫而殺直臣忠莫顯於身見殺而其言驗洩

治所爲不憚斧鉞盡

子忍反

言於其君者正謂靈公君

臣通於夏徵舒之家恐其及禍不忍坐觀故昧死言

之靈公不能納又從而殺之卒以見弑而亡其國此

萬世之大戒也特書徵舒之名氏以見洩治忠言之

驗靈公見弑之由使有國者必以遠

去聲

色修身包容

狂直開納諫諍爲心也

家氏曰君無道稱國以弑陳靈朋淫殺諫而弑者以氏名

書蓋不著徵舒氏名無以見禍亂之所從生討徵舒亦所以治平國也

以爲罪不及民

故稱大夫以弑者

杜氏曰惡不加民故稱臣以弑

非經意矣

張氏曰古人以

禮爲防閑而人君之尊有妃偶嬪御之侍有居處出入之奉有廉恥羞惡之限所以養其尊貴者至矣何至驅馳於株林以爲樂哉洩冶之諫夏南之詩皆以其捨人道而躬爲禽獸之行也考之外傳前年單子如楚過陳時洩冶未死也單子歸而告王以陳侯帥其卿佐南冠以淫於夏氏陳侯不有大咎國必亡已見之於三年之前矣能無及乎觀春秋所書弑君如陳平國齊光蔡固以千乘之主而自儕於閭巷小人所不爲者心術之惑可不戒哉高氏曰靈公弑而子午嗣是爲成公成公不討弑君父之賊則知靈公之惡播於國人而徵舒之罪國人所不慈也愚按禮稱諸侯非問疾弔喪而入諸臣之家是謂君臣爲謚註者謂陳靈公數如夏氏以取弑焉夫人君之舉動尚謹於嫌疑之際而不可輕也况可紊男女之別恣爲

獸之行其不為米溫
之萬段者幾希矣

六月宋

文

師伐滕

左傳滕人恃晉而不事宋宋師伐滕

前圍滕稱人刺

與諫同七賜反

伐喪也此伐滕稱師譏用衆

也宋大國爵上公霸主之餘業力非不足也今鄰有

弑逆不能聲罪致討

王氏曰宋鮑以篡弑得國視陳鄭逆亂恬不為怪

乃用

大衆以伐所當矜恤之小邦且滕不事已無乃已德

猶有所闕

僖十九子魚曰云云

而滕何尤焉故特稱師以著其

罪而汲汲於誅亂臣討賊子之意見

音現

矣家氏曰宋鮑問晉之

多故而用師於滕園之未服又從而伐之未必無宋襄執嬰齊之心襄且不能有成而況於鮑乎春秋書之所以貶之也

公孫歸父如齊

項

葬齊惠公

歸父仲遂之子

杜氏曰歸父襄仲子

貴而有寵宣公深德齊侯

之能定其位而又以濟西田歸之也故生則傾身以

事之而不辭於屈辱沒則親往奔喪而使貴卿會其

葬亦不顧天王之禮闕然莫之供也比

毗志反

事考辭

義自見

音現

愚按春秋以卿會葬惟襄王景王晉之襄平昭公此年齊惠及宋平滕成八見

而已天子之喪動天下屬諸侯遣卿送葬夫亦亡於禮者之禮耳晉之諸君猶曰霸國也齊惠之葬乃宣公所以報私恩而宋平則意如所以厚私姻也若滕則其君屢會葬于魯矣當時諸侯慢於至尊而謹於強大莫不皆然靈王之喪鄭簡公在楚印段實往王吏不討子太叔反以爲口實積習所致可勝嘆哉

晉景人宋文人衛人曹文人伐鄭

襄

按左氏鄭及楚平諸侯伐鄭取成而還

襄陵許氏曰自晉靈以來

成景相繼力爭陳鄭而無以服楚其稱人貶也鄭居大國之間從於

強令豈其罪乎不能以德鎮撫而用力爭之是謂五十步笑百步庸何愈於楚自是青楚益輕罪在晉矣

高氏曰是時陳有弑君之亂曾不是國而從事於鄭張氏曰舍亂臣賊子之大惡而輕動干戈以討於迫於強令無所適從之小國家氏曰人四國所以人晉也夫躬天下之難而後可以責人之從已未聞躬天下之易而責人以強從也桓文所以得諸侯以其內獎王室外攘荆楚救災恤患汲汲焉躬天下之難諸侯有所恃外夷有所畏是以得成霸業自晉襄沒靈成景皆不克負荷而楚莊日以盛強壯向而爭諸侯侵陳侵鄭觀兵周疆將逞其大欲晉人僅出偏師畏縮不敢犯荆楚之鋒惟伺其去釋憾於小國今又討鄭縱能服之豈保楚之不再出乎夫翦篡鋤兇霸政之最先自趙盾爲政宋齊魯皆弑其君盾內有所嫌置而不問今卻缺爲政又不能治侯國之賊其君者乃率三國爭鄭而以討逆遺楚遂使夷國挾仗義之名以風示天下

晉霸自是愈衰矣

秋天王

定

使王季子來聘

王聘止此左傳劉康公來報聘公羊傳王季子者何天子

之大夫也其稱王季子何貴也其貴柰何母弟也穀梁傳其曰王季王子也其曰子尊之也聘問也

公羊傳

去聲

曰王季子者王之母弟也

杜氏曰字季子即康公其後食

采於劉

王有時聘以結諸侯之好

去聲

周禮大行人

禮也宣公

享國至是十年不朝于周而比

毗志反

年朝齊不奔王

喪而奔齊侯喪不遣貴卿會匡王葬而使歸父會齊

侯之葬縱未舉法勿聘焉猶可也而使王季子來王

靈益不震矣自是王聘春秋亦不書矣

襄陵許氏曰自是王靈益

亡王聘益輕春秋不復錄矣陳氏曰自頃王而下王室無聘魯者於是再聘而王季子實來則已尊矣愚按宣公簡慢於王知有齊而不知有周所以君臣朝夕奔走於臨淄之境者其心必曰濟西之田未復不可不曲意事之而不思魯封七百里之地秋毫皆君賜也而拔本塞源其罪應誅定王始則徵聘於魯中則厚賄於仲孫終則命貴弟報聘是猶為人父而不責子之狼傲乃三揖於定省之常禮而德色於僭褻之微恩也宣公既不知所當尊而王亦不能自尊矣故來求之書止於文公來聘之書止於宣公錫命之書止於成公非削之而不紀蓋王命不足爲輕重而王亦不復遣使於諸侯耳寥寥百有餘年而桓尚以歸賑錄自是天王之名號不見於經矣

公孫歸父帥師伐邾定

取繹

繹公作類杜氏曰繹邾邑魯國鄒縣北有繹山張氏

曰詩保有鳬繹邾文公卜遷于繹皆此山之地今在襲慶府鄒縣爲邾魯二國之境愚按鄒縣今屬益都路

用貴卿爲主將

去聲

舉大衆出征伐不施於亂臣賊子

奉天討罪而陵弱侵小近在邦域之中附庸之國是

爲盜也

孟子曰非其有而取之者盜也

當此時陳有弑君之亂既來

赴告藏在諸侯之策矣

見左傳文十五襄二十

曾不是圖而有

事於邾不亦僨

音顛

乎故四國伐鄭貶而稱人魯人伐

邾特書取繹以罪之也

高氏曰自文公時邾魯有隙宣公篡立而邾子首朝之自

是絕迹魯庭者又十年故歸父伐之家氏曰滕何負於宋而宋伐之邾何負於魯而魯侵之皆由中國無

盟主強陵弱衆暴寡而莫之或禁也愚按無瑕者始可以討人宣公慕立惴惴然自保惟恐諸侯之動干戈而問子赤之故也其不能討陳宜矣而猶稱兵於邾以奪其地者蓋以晉伯之不振而強齊爲之援故耳不幾碩鼠欺人之不見而竊食於盆盎之間乎下書歸父爲邾故如齊則魯之爲魯可知矣

大水

張氏曰陰盛陽微之徵家氏曰宣即位以來六年

旱而書大水而書大以變常書也宣嘗以臣弑君以子逐母罪大惡極天討未加發而爲水旱之灾民受其虐書以示戒也

○季孫行父如齊冬公孫歸父如齊

宣公聘齊止此

按左氏行父如齊初聘也歸父如齊邾故也齊侯嗣立宣公親往奔其父喪又使貴卿會葬矣若待逾年

然後修聘未晚也而季孫亟行歸父繼往則以宣公

君臣不知爲國以禮而謂妄說音悅取人之可以免於

討也

曲禮禮不妄說人

歸父貪於取繹畏齊而往蓋理曲則

氣必餒矣能無畏乎哉春秋備書而不削以著其罪

爲後世鑒也

高氏曰以伐邾故恐齊人以為討遂謀伐莒焉甚矣魯之懼齊也二歲之間而

公與大夫五如齊矣思按自反而縮則可以自立何畏於齊宣公行已有謙故君臣相及於齊而猶懼其

獲戾也

齊侯

頃

使國佐來聘

左傳國武子來報聘

葬之速也

惠公三月而葬

大

音泰不懷也

又未逾年而以

君命遣使

去聲

聘于鄰國則哀戚之情忘矣孟子曰養

去聲

生不足以當大事惟送死可以當大事滕文公五

月居廬未有命戒及至葬顏色之戚哭泣之哀弔者

大悅而有願爲其氓者蓋禮義人心之所同然也齊

頃

音頃

公嗣位之初舉動如此喪

去聲

師失地幾見執獲

成二年戰

鞏敗齊

豈特婦人笑客之罪哉

見左傳十七年

已失守身

之本矣

高氏曰嗣子踰年即位始稱君未踰年稱子故葵丘之會稱宋子蓋齊桓方倡大義以尊

中國故宋公雖在喪而來與會亦不深責以其不獲已而趨急務爾魯之於齊與國也聘雖後時亦何害耶惠公之葬既速又未踰年而以君命遽遣使來聘焉議伐莒也當凶釁而行吉禮忘哀思而結懽好書曰齊侯著其惡也

饑公羊傳何以書以重書也張氏曰王政以民食為重故積貯天下之大命也前此百有餘年水旱螽螟之灾多矣不以饑書今大水之後特書饑者著宣公煩於事外國用無節上下用竭故一遇水旱遂致乏食耳

○楚子

莊伐鄭襄左傳楚子伐鄭晉士會救鄭逐楚師于潁北諸侯之師戍鄭

經有詞同而意異者比

反志

事以觀斯得之矣九年

楚子伐鄭稱爵者貶詞也若曰國君自將

去聲

恃強壓

弱憑陵中夏之稱也知然者以下書晉卻缺帥師救

鄭則貶楚可知矣此年楚子伐鄭稱爵者直詞也若

曰以實屬

章欲反

辭書其重者

公羊君將不言帥師書其重者也

而意

不以楚爲罪也知然者以傳去聲書晉士會救鄭逐楚

師于潁北

杜氏注潁水出河南陽城

而經削之則責晉可知矣此

類兼以傳爲案者也

高氏曰晉士會救鄭及諸侯戌鄭而春秋削之者責晉雖得鄭

而不能有之也家氏曰士會用偏師無益於救鄭是歲鄭即楚故略而不書耳

癸定王
亥九年

十有一年

晉景二齊頃公無野元年衛穆二蔡文十四鄭襄七曹文二十陳成公午

元年杞桓三十九宋文
十三秦桓七楚莊十六

春王正月○夏楚子

莊

陳侯

成

鄭伯

襄

盟于辰陵

穀作夷陵左傳春楚子伐鄭及櫟子良曰晉楚不務德而兵爭與其來者

可也晉楚無信我焉得有信乃從楚夏楚盟于辰陵陳鄭服也朱子曰宣公之時楚莊盛強主盟中國杜氏曰辰陵陳地潁川長平縣東南有辰亭張氏曰今淮寧府西華縣愚按西華縣在今汴梁路陳州

晉楚爭此二國爲日久矣今陳鄭背

音

晉從楚盟于

辰陵而春秋書之無貶詞者豈與其下喬木入幽谷

乎

詩伐木出自幽谷遷于喬木愚按孟子以喬木崇高譬中國以幽谷卑下譬南蠻

中國不

能令則蠻荆進矣

薛氏曰陳鄭以中國之不足恃而盟于楚由中國之無伯諸侯之失

其特也 經之大法在誅亂臣討賊子有亂臣則無君有

賊子則無父無父無君即天理無復少存人類殄爲

禽獸雖得天下不能一朝居也

見孟子

今魯與齊方用

兵伐莒晉與狄方會于攢函而不謀少

去聲

西氏之逆

也而楚人能謀之所謂禮失而求之野

前藝文志仲尼有言云云

顏師古曰言都邑失禮不以其僻處南荒而遂外之

也

孫氏曰與楚者傷中國無人喪亂陵夷之極也

辰陵之盟所以得書於經

而詞無貶乎聖人討賊之意可謂深切著明矣

張氏曰楚

莊於是合二國爲盟而欲討陳夏徵舒也春秋以晉齊二大國方且致勤於莒狄而不能討獨楚莊合諸侯以討之所以楚子書爵於陳侯鄭伯之上與之也愚按楚自會孟之後未嘗稱爵與於會盟今書子序陳侯鄭伯之上楚初主盟也會孟稱爵貶之也不稱爵則疑於楚大夫而執宋公之罪不著也盟辰陵書爵予之也予其謀討陳之賊也後此盟于蜀楚公子嬰齊序諸國大夫之上貶而稱人不于嬰齊之主諸侯也宋號之盟屈建公子圍先軟而經首晉不與楚之狎主盟也申之會楚子爲主而不殊淮夷則皆狄也由是知辰陵之盟楚子先序而無貶詞蓋予之也

公孫歸父會齊

頃

人伐莒

李佗張氏曰莒恃晉而不事齊魯從齊而伐之兵不討亂

而挾強凌弱深著齊魯之罪也蜀杜氏曰稱齊人以示貶人齊亦以人魯也必書公孫歸父亦以志大夫之專

也愚按伐邾伐莒皆以歸父將重兵而後此會齊侯會
楚子皆歸父特會國君以見宣公之德仲遂而寵其子
使專權於魯也至雎之
逐得非肇端於此歟
○秋晉侯景會狄于欒欒才
左傳晉卻成子求成于衆狄衆狄疾赤狄之役遂服于
晉會于欒函衆狄服也穀梁傳不言及外狄也杜氏曰
狄地

春秋正法不與外域會同分類也書會戎會狄會吳

皆外詞也

范氏曰所以異之於諸夏薛氏曰諸侯內之與外會皆在所可罪則盟主可知也

中國故詳外四裔故略今中國有亂天王不能討則
方伯之責也又不能討則四鄰諸侯宜有請矣而魯

方會齊伐莒晉方求成于狄是失肩背而養其一指

不能三年而總小功之察

南刺張氏曰孟子所警言舍大徇小

不亦偵

音乎凡此直書其事不待貶絕而義自見

音者也趙

曰當時陳鄭之君並相率而從楚而狄人尚念伯國之餘烈從晉不與故晉侯親往會之夫諸侯恃者晉魯方伐莒晉方會狄而使楚人為伯者之事此反道也陳氏曰楚方倡義於天下而晉孜孜於羣狄至往會焉晉卑甚矣是故楚莊之春秋晉有諸侯之事不悉書也宣三年晉侯伐鄭不書五年荀林父伐陳不書張氏曰晉侯為盟主而往與狄會捨夏徵舒以遺楚討使楚舉大義以加於中國又欲與楚爭鄭楚直晉老所以敗于邲也愚按晉景就狄地為會與僖三十二年衛人及狄盟義同

冬十月楚

莊

人殺陳

成

夏徵舒丁亥楚子入陳

殺梁

傳此入而

殺也其不言入而殺明楚之討有罪也日入惡入者也程子傳人衆辭大惡衆所欲知也誅其罪義也取其國也惡

稱人者衆辭也

杜氏曰不言楚子而稱人討賊詞也范氏曰變楚子言人者弑君之賊若

曰人人所得殺也陳氏曰楚亟稱子矣自宋萬而下無討賊者雖討之不以其罪且百年於此則楚之討徵舒其不曰楚子何討賊不以內外貴賤恒稱人高郵孫氏曰討賊雖諸侯雖大夫雖國人雖外國必皆曰大惡人人之所同惡

去聲

人人之所得討其稱楚人

殺徵舒諸夏之罪自見

音現

矣高氏曰弑君之賊固人可得而殺之豈有楚

人之間哉徵舒弑君今已踰年國人不能討天子方伯不能誅反致南蠻入中國而殺之彼南蠻尚知弑君者之當殺則中國如之何不能殺之耶聖人書此傷中國之不自正也薛氏曰見賊之不討於中國而討於荆蠻也雖然天下之惡一也楚殺徵舒與衛殺州吁蔡殺陳佗一例書之所以明亂臣賊子人道共惡人人得誅初不問於中外所以廣忠孝之路而拯三綱於大亂之日也按左氏傳夫楚

子爲

去聲

夏氏亂故謂陳人無動將討於少

去聲

西氏

杜氏

曰少西徵舒之祖子夏之名

遂入陳殺徵舒轅

音惠車裂之也

諸栗門

陳城

門

而經先書殺後書入者與楚子之能討賊故先之

也

陳氏曰不書入而後殺子之以討賊之義也則討賊一事入一事也愚按晉文執曹伯非伯討故先

書入曹後書執曹伯楚靈殺齊慶封雖殺有罪而不
以討賊殺之故先書伐吳而後書殺慶封亦不係之
楚人則知此以討其賊為義取其國為貪舜跖之石
討賊于楚莊也

之相去遠矣其分乃在於善與利耳楚莊以義討賊

勇於為善舜之徒也以貪取國急於為利跖之徒矣

為善與惡特在一念須臾之間而書法如此故春秋

傳心之要典不可以不察者也或曰聖人大改過楚

雖縣陳能聽申叔時之說而復

扶反

封陳

陳侯在晉申叔時使

於齊反復命而退王使讓之曰夏徵舒為不道弑其
君寡人以諸侯討而戮之諸侯縣公皆慶寡人女獨

不慶寡人何故對曰夏徵舒弑其君其罪大矣討而戮之君之義也抑人亦有言曰牽牛以蹊人之田而奪之牛牽牛以蹊者信有罪矣而奪之牛罰已重矣諸侯之從也曰討有罪也今縣陳貪其富也以討召諸侯而以貪歸之無乃不可乎王曰善哉可謂能改乃復封陳鄉取一人焉以歸謂之夏州

過矣猶書入陳以貶之何也曰楚莊意在滅陳雖復

封之然鄉取一人焉以歸謂之夏州

杜氏曰州鄉屬示討夏氏所獲

也而又納其亂臣是制人之上下使不得其君臣之

道也

范氏曰二人與君昏淫當絕之而討強納之執國威柄制其君臣傾倒上下錯亂邪正

晉

人以幣如鄭問馬乞之立故子產對曰若寡君之二

三臣而晉大夫專制其位是晉之縣鄙也何國之爲

辭客幣而報其使

去聲

晉人舍

如之

昭十九年鄭駟偃卒偃娶於晉大夫

生絲弱其父兄立駟乞他日絲以告其舅晉人以幣如鄭問駟乞之立故子產對云云

他國非

所當與

去聲

也而必欲納其亂臣存亡興滅其若是乎

通旨南唐李氏既臣于周以進退大臣之事請之而世宗無所可否以他國非所當與也

仲尼重

傷中國深美其有討賊之功故特從末減

左昭十四注末

薄也減輕也

不稱取陳而書入雖曰與之可矣

陸氏曰楚子之討正

也故書人入人之國又納淫亂之臣邪也故明書其爵以示不正春秋之義彰善癉惡纖芥無遺稱事原

情瑕瑜不掩斯之謂也愚按春秋子楚莊之討徵舒而稱楚人亦猶吳闔廬之救蔡而戰于柏舉稱吳子也楚子入陳目其人而貶之亦猶吳入郢之舉號也辭雖不同意實無異蓋楚莊闔廬實非有討賊救患之誠心故書法予奪如此也使楚莊真有討賊之心則辰陵之盟執徵舒而誅之一匹夫之力耳奚俟於以重兵造其國都而後戮之哉使其素有討賊之志則四年之伐鄭俘歸生而輟諸桔枵之門而仗義之名著於中國矣奚待於三月之圍失賊不討而受肉袒之降哉由其本無是心而假其事以爲功故不足以進於此也文定謂假於討賊以縣陳信矣論者以楚莊居五霸之列亦取其討賊之一節如秦穆之悔過耳抑方諸吳闔廬夫差之暴橫而或者亦以霸許之則秦穆楚莊猶爲此善於彼者歟○劉氏曰公羊云此楚子也其稱人何貶也非也此譬猶蔡人殺陳陀耳且外討弑君之賊何不得乎穀梁云此入而殺

其不先言入何也外徵舒於陳也非也言楚人殺者乃明徵舒有罪爾且先言入後言殺可謂內徵舒於陳乎

納公孫寧儀行父于陳

成寧公作甯公羊傳此皆大夫也其言納何納公黨與也穀梁

傳納者內不受也輔人之不能民而討猶可入人之國制人之上下使不得其君臣之道不可程子傳致亂之臣國所不容也故書納

此二臣者從君於昏宣淫於朝誅殺諫臣使其君見弑蓋致亂之臣也肆諸市朝與衆同棄然後快於人心今乃詭辭奔楚託於討賊復讎以自脫其罪而楚

莊不能察其反覆

音福

又使陳人用之是猶人有飲毒

而死者幸而復

去聲

生又強

上聲

以毒飲

去聲

之可乎故聖

人外此二人於陳

賈逵曰二子不繫之陳絕於陳也

而特書曰納納

者不受而強

上聲

納之者也爲楚莊者宜奈何瀦

音諸

徵

舒之宮

檀弓殺其人壞其室洿其宮而谿焉

封洩冶之墓

書武成封比干墓

尸

孔寧儀行父于朝謀於陳衆定其君而去其庶幾乎

高氏曰二子之惡乃其君之所由以弑者亦與徵舒

何異豈可復居陳大夫之位哉已絕於陳故不繫於

陳而書納張氏曰孔寧儀行父必因奔楚誘楚子以

利故楚子殺徵舒而縣陳微申叔時之言則陳遂亡

矣楚莊懷變詐貪婪之志而尚能以義自克故封陳而不取然見善不明而非有改過不吝之心所以雖封陳而終宥陳之亂臣復納諸國聖人予善之弘待人之公先旌其討賊之義然後著其入陳且納亂臣之罪使楚莊之善惡功罪顯然明白詳味此論非聖人莫能修之也愚按孔寧儀行父不書奔書奔則是寧行父請討於楚也其歸不係陳不使得為陳之臣也經凡書納皆非所宜納書曰楚子入陳納公孫寧儀行父于陳曰入曰納則二臣之罪與楚莊納之之惡皆見矣。啖氏曰左氏云書有禮也若以納亂臣為有禮孰為非禮

春秋胡傳附錄纂疏卷十七